

# LETŠOAO

 Palo ea Lentsoe. Tšebeletsong e koalang, lebaka ha ke le kōpile ho ema... Ha ba bina *Folaga E Methala-Linaleli*, le a ema. Ha le etse joalo? [Phutheho e re, "E."—Mohl.] Hobaneng le sa emele Lentsoe la Molimo? Ke hlompho. Joale koana Bukeng ea Exoda, khaolo ea 12, ho qala ka temana ea 12, ke lakalitse ho bala karoloana ea Lengolo, temana 12 le 13.

*Ka bosiu boo Ke tla haola ka naha ea Egepeta, ke otle...matsibolo a naha ea—ea Egepeta, a batho le a liphooftolo; 'me...tla hlahisa likahlolo: Ke 'na MORENA.*

*'Me mali e tla ba ho lōna letšoao tlung ao le lutseng ho ona; ke tla bona mali, ke le fete, 'me kotsi ha e ka ke ea e-ba holima lōna ho le bolaea, ha Ke otla naha ea Egepeta.*

2 Sehlooho sa ka ke: *Letšoao*.

3 Ha re inamiseng lihlooho tsa rōna joale. 'Me khutsong ea Oona ea motsotso ona o khetheleng, pele re Mo atamela ka thapelo, na kōpo e teng u ratang Molimo ho e arabela thapama ena? Phahamisa matsoho a hao feela ha u batla, le ho hopola seo u batlang A se etse tlase pelōng ea hao. Hohle ka mohahong, hopola seo u batlang A se etse.

4 Ntata rōna oa Leholimō, U Molimo o sa fetoheng, 'me re U rapela ho arabela lithapelo tsa rōna, thapama ena, re sa—re sa tšoere matsoho a rōna. 'Me U bona matsoho a ka a phahameng, le oona. 'Me kōpo ea ka, ke tla e tsebisa phatlalatsa, ke ho re, Morena, U tle u folise motho mang le mang ea kulang ka mona kajeno, pholosa e mong le e mong ea timetseng. Joale, U itse, "Ha le kōpa Ntate eng le eng, ka Lebitso la Ka, Ke tla le etsa." Joale, Morena, re thusē ho lumela 'moho re le batho ba ngata 'ngoe, ea bana ba lumelang. Bua ka Lentsoe la Hao, Morena. Lentsoe la Hao ke 'Nete. Hlohonolofatsa lipelō tsa rōna.

5 Re U leboha ka kōpano ena. Re U leboha ka Moena Grant, le ka basebetsi bohole ba hae, le likereke tsohle le batho. Le ka sohle seo U re etselitseng sona, Morena, re motlotlo ho Uena. Ntate, bongata ba rōna mona bo ka tšoha bo sa tlo bonana hape le ka mohla joale, hofihlela re bona mose oane. E ka ba tšebeletso ea ho qetela ena re lula 'moho lefatšeng lena. Moea o Halalelang a tle ho re hlohonolofatsa 'moho, ho baballa litlhoko tsa rōna. Ka Lebitso la Jesu re a rapela. Amen.

Le ka lula fatše.

6 Mona ke tšoere papetlana ea pampiri, ke ngola Mangolo a 'maloa le linthoana. Qalong ke ne ke a hopola ka kelello, empa ke sa tsoa tlola mashome a mabeli le metso e mehlano, le a tseba, ke ho re, khetlo labobeli. 'Me ha ke sa hopola se sa mehleng,

ke ho patisoa ke likōpano le lintho hakaale, le ho etsa tse ngata hakana.

<sup>7</sup> Sehlooho sa rōna thapama ena *ke: Letšoao*. Tema ea rōna e phetloa Egepeta. Ke setšoantšo se seholo mona joale, ke batla bohle le se bone 'me le apare tšabo eo le e khonang. Malulo a tema ke Egepeta, 'me nako ea tema ke feela mathoasong a exoda.

<sup>8</sup> 'Me, joale, ke papiso ea kajeno, e suptjoang, etsoe le rōna re tjamelane le exoda e 'ngoe. Molimo o ntša Iseraele Egepeta, ho isoa latšeng la pallo, e ne e le papiso ea Kreste ea ntšang Monyaluoa kerekeng, ho ea Lefatšeng la pallo. Re kenetse exoda e 'ngoe. Joale ha le ka hlahloba Lengolo, nako ea rōna ke ho etsa malaba-a-nkoe feela, ke 'nete. Rōna re... Joalokaha Molimo o ntšitse sechaba ho sechaba, Molimo o tla ntša Monyaluoa ho kereke. Monyaluoa o tla bitsoa likerekeng tsohle. E tla be e le mokhethoa oa Molimo, o tla ntšuoa. 'Me re lintšing tsa exoda eo hona joale hantle, hoba re kakatletse bopaki bohle ba Mangolo bo reng re eme mono. Joale, ke a tseba ho builoe khafetsa, empa, motsoalle oa ka, e tla boleloa khetlo la ho qetela ka le leng. Nako e tla nyamella Bosafeleng ke hona. O tlile ho ntša Monyaluoa ho kereke.

<sup>9</sup> Se entseng phapang lipakeng tsa Egepeta le Iseraele e le letšoao, lichaba tse peli. Kaofela e le bana ba batho, empa bohle ba bopiloe ke Molimo, bohle e le mosebetsi oa liatla tsa Molimo, empa, phapang mohla kotlo ea lefu e lihuoang, phapang lipakeng tsa bophelo le lefu e ne e le letšoao.

<sup>10</sup> 'Me ho tla ba joalo ho tleng ha Mora Molimo, mohla A ntšang Monyaluoa ho kereke, phapang e tla ba Letšoao. Joale, le sekehetsa tsebe thapama ena, ho bona haeba e se 'nete na. Letšoao e tla ba phapang. Phapang e tlameha e be teng.

<sup>11</sup> Molimo o tla ahlola lefatše, tsatsi le leng. Ha nka botsa batho Katolike, O tla ahlola mang, O tla ahlola lefatše ka'ng? Ba ka re, "kereke." Kereke efe? "Kereke ea Katolike." Kereke efe ea Katolike, athe li 'maloa? Bamethodise ba ka re, "ka Methodise," e tla ba Mabaptise a kantle. Ka hona, ha u le ahlola ka kereke ea Baptise, tse ling tsohle li kantle. Mapentekosta a re, "ka Pentekosta," e tla ba tse ling tsohle li kantle. Le a bona, e ka ba pherekano, pherekano e ngata haholo, e ka ferekanya kelello haholo, ho nahana ntho e joalo.

<sup>12</sup> Empa mona Molimo oa hlophisa mokhoa A o boletseng A tla ahlola lefatše, ha se ka kereke ea Katolike, ha se ka kereke ea protestanta. Empa O tla ahlola lefatše ka Jesu Kreste, 'me Jesu ke Lentsoe, ka hona ke eo e khutlela ho Bibele hape. Le a bona? O tla ahlola lefatše ka Bibele. 'Me Bibele ke Buka ea Molimo ea kahlolo, e leng tšenolo e tletseng ea Jesu Kreste, ha ho letho le ka eketsoang kapa letho la fokotsoa ho Eona; kotlo ea ketso eo, ke ho ntšoa ha lebitso la hao Bukeng ea Bophelo. Tsitlallela Buka hantle, le ho rapela Molimo ho re fetola karolo ea ntho Eo.

<sup>13</sup> Joale re a fumana, letšoao, letšoao ke'ng? Letšoao ke sesupo sa theko e lefuoeng, letšoao ke leo. Joaloka litsela tsa rōna tsa seporo le mebila ea bese, re tšoara chelete ea rōna re ea seteisheneng. Joale, le a bona, 'mila oa bese ha o a lumelloa, moo ho sebelisoang matšoao, ha ba lumelloa ho amohela chelete. Ba ke ke ba amohela chelete, ho hlokoa letšoao; ha re re, lifofane, e ka bang eng. Ha u fihla setšeng se itseng, tafoleng ea ho reka, le ho reka, ka chelete ea hao, matšoao a makana, letšoao le ikhethang lena. 'Me letšoao lena ke sesupo se reng moputso oa hao o lefuoee. U na le tokelo holim'a sekepe, ho palama sefofane, ho palama bese, kapa e ka bang eng, ha feela u tšoere letšoao le u—le u tlalehang leeto la hao le lefuoee. Joale le hopole seo. Le se ke la se lebala.

<sup>14</sup> Konyana ea Iseraele e hlabiloeng e ne e le . . . e le tlhoko ea Molimo. Jehova o hlokile konyana e hlabiloeng, phapanyetso e se nang sekoli. Joalokaha re haotse teng veke e fetileng joale, ha thoe Molimo, ha O etsa qeto, ha O e fetole le ka mohla. 'Me O betlike tsela, ntho ea Oona ea pele eo O e entseng mohla motho a tlotseng, Oa tlameha ho mo betlela tsela e khutlang, haeba O kile oa batla ho mo lopolla, 'me Oa etsa qeto e reng O pholositse motho ka Mali a Mohlokasekoli. 'Me O sebelitse ka ho tšoana kamehla. Ha O eso e fetole. Ha ho moo Molimo o ka kōpanang le morapeli ofe le ka mohla, ke tlasa Mali feela. Ke eona feela nqalo ea Oona.

<sup>15</sup> Re leka ho Mo teanya tlasa thutamolimo, tlasa bolumeli ba rōna, tlasa mananeo a rōna a thuto. Ba bang ba ahile litora le ba bang ba ahile metse, Babilona le—le torna ea Babele, le lintho tsohle tse fapaneng ka mefuta. Empa ho sa lutse ho le joalo, Molimo o kōpana le morapeli oa mannete feela tlasa Mali. Ha O e fetole le ka mohla. Re ke ke ra ba Methodise bohole, 'me bohole re ke ke ra ba Mapentekosta, 'me bohole re ke ke ra ba *sena, sane*, kapa se *seng*, re tla banana. Empa ha ke fihlela motho, e ka ba moprista oa Katolike kapa e leng eng, ha a le tlasa Mali re baena, ho sa tsotolehe moo a leng teng, ha a mpa a le tlasa Mali.

<sup>16</sup> Joale, tlhoko ea Jehova e ne e le konyana e hlabiloeng ea Iseraele, 'me mali e le letšoao le reng mosebetsi o phethiloe. Molimo oa na oa batla bakeng sa topollo, ho tsoa Egepeta, ho ea lefatšeng la pallo, O hlokile phooftolo e hlabiloeng. 'Me phooftolo eo e tšoanelo ho ba le . . . Mali a phooftolo e shoeleng a tšoanelo ho tšasoa koseneng le holim'a monyako, 'me hoo ho emetse letšoao le reng seo Jehova a se hlokileng se entsoe. Le a bona? Joale, konyana e ne e se letšoao, mali e ne e le letšoao. Joale, bophelo bo ne bo tsoile sehlabelong, 'me joale mali e ne e le letšoao. Litaelo tsa Oona li entsoe. Mali a emetse letšoao, pontšo e reng molumeli enoa o phethisitse tlhoko ka tšoanelo. E ne e le letšoao leo. Ke hantle, ho bona molumeli, a rapela, a entsoe setlama se le seng le sehlabelo sa hae. Le a bona?

<sup>17</sup> Ntlu ke *ena*, le morapeli, tlhoko e ne e le efe? “Hlaba konyana. Ka letsatsi le leshome le metso e mene hoba e bolokoe, e—e tona e se nang sepha, e tla hlabjoa ke Israele eohle, ’me mali a tla qopetsoa ka hisopa a tlotsoe koseng ea monyako.”

<sup>18</sup> ’Me, ebile, hisopa e le littlama tse qaphakileng. *Hisopa* e bolela “tumelo ea hao.” Motho ea ntseng a leka ho fumana tumelo e mohlolo, lebaka leo u fosang pholiso ea hao. Tumelo ke ntho e qaphakileng feela. U na le tumelo ho tla kerekeng. U na le tumelo ho tsoa mane. U na le tumelo ho lumisa koloi ea hao. U na le tumelo ho ja tinare ea hao. Ho lutse ho le joalo, tumelo e qaphakileng feela. Joale ho tlotsa mali, a ne a tlotsoa ka hisopa, e leng littlama tse qaphakileng li mela hohle Palestina, ho supa hore tumelo eo mali a tla tlotsoa ka eona ha se ntho ea tonana moo u tlamehang ho apesoa digarata tsa bongaka tsa mefuta eohle ho e phethisa. E qaphakile feela, tumelo ea letsatsi ka leng, ho lumela Molimo. Le a bona? “Tlotsa mali,” ka tumelo, “ka hisopa.”

<sup>19</sup> Joale, morapeli, ka hona, ea bonoeng tlasa mali ana, o itšupile a phethisitse kōpo ea Jehova, ’me o ne a tsebahalitsoe. Letšoao le mo supile a entsoe setlama le konyana e hlabiloeng eo Jehova a e hlokileng. Mosebetsi o entsoe. Ke papiso e phethehileng hakae kajeno, ea Kreste le molumeli. Haeba Letšoao le pepesitsoe ho molumeli, Le e supa e amohetsoe le mosebetsi o entsoe.

<sup>20</sup> Ka hona, mali e ne e le letšoao la boitsebiso, mali ka sebele. Phoofolo e lutlike mali, e shoele, ’me mali a eona a lerakong. Joale, bophelo ba phoofolo, bo neng bo le maling. ’Me bophelo bo maling, re tseba seo. Bibele e itsalo, saense e a e paka, bophelo bo maling. Ka baka leo ha phoofolo e bolaoa, ’me bophelo bo khaoloa phoofolong, mali a eka khona e be khemistri ea mali, ho emela letšoao. Hobane, bophelo bo maling bo sitiloe ho khutlela holim’ a molumeli, ka ha e ne e le bophelo ba phoofolo.

<sup>21</sup> ’Me bophelo ba phoofolo le bophelo ba motho a fapané ka botlalo. Ha ho letho, ho eona ho hang. Haeba u nkile, ho nka mali a phoofolo o a pompela ho uena, u tla shoa. Ka hona u a bona, rōna, ke e—ke bophelo bo fapaneng maling a phoofolo ho mali a motho, hobane motho o na le soule. Phoofolo ha e na soule.

<sup>22</sup> ’Me joale, ka baka leo, mali ka sebele, le utloisise joale, khemistri e khubelu, dikhemikhale tsa mali, tsa tlameha ho ema kantle holim’ a monyako, e le letšoao le reng konyana e shoele, joale, kahobane bophelo ba konyana bo sitiloe ho khutlela holim’ a morapeli oa motho. Empa kajeno... E ne e le papiso feela.

<sup>23</sup> Kajeno ha se khemikhale ea Mali a Morena Jesu, Konyana ea rōna, empa ke Bophelo bo neng bo le Maling, e leng Moea o Halalelang. Bo a khutla ’me ke Letšoao le reng re amohetse re entse hantle seo Molimo o re laetseng ho se etsa. ’Me hape,

ka ho ba le Letšoao, re etsoa setlama le Sehlabelo sa rōna. Ka phetheho. Ha ke bone kamoo ntho efe e fetisang e ka hlakang ho feta. Le a bona?

<sup>24</sup> Tsela eo mang a ka bolelang hore ntlu eo e ruiloe, hape, tlasa mali, hobane khemistri ea mali e holim'a menyako. Ba ne ba feta, Lengeloi la lefu la tlameha ho sheba le ho bona mali. Joale, hape, e ne e le papiso ea Moea o Halalelang.

<sup>25</sup> Joale, le a bona, Mali a Jesu ka seqo a ne a ka sitoa ho lula holim'a e mong le e mong oa rōna, hobane 'meleng oa Hae Mali a Hae a ne a le makana feela. 'Me a rothile a fela, a tsoa 'meleng oa Hae, a monyela mobung, lilemong tse likete tse peli tse fetileng; empa a ne a sa tl'o emela Letšoao. Bophelo, Bophelo bo Maling, e ne e le Letšoao joale. Ke tla le pakela eona, motsotsong feela, ka Bibele. Ke Letšoao le tlang ho theohela holim'a e mong le e mong oa rōna, ho re supa re entsoe setlama le Sehlabelo sa rōna, 'me re phethisitse tlhoko ea Jehova.

<sup>26</sup> Petrose o buile, ka Letsatsi la Pentekosta, "Bakang, e mong le e mong oa lōna, le kolobetsoe ka Lebitso la Jesu Kreste tšoarelong ea sebe, le tla amohela neo ea Moea o Halalelang. Hobane pallo e etselitsoe lōna, le bana ba lōna, le ba leng hole, bao Morena Molimo oa rōna a tlang ho ba bitsa." Le a bona, a sa ba bontše eona feela. "Ba bangata bao Morena a tlang ho ba bitsa."

<sup>27</sup> Ba bangata ba hopolang ba bitsitsoe. Empa bohole bao "Morena" a ba bitsang! "Bao A ba tsebileng pele, O bile o ba bitsitse; bohole bao A ba bitsitseng, O bile o ba beile ba lōkileng; bohole bao O ba beileng ba lōkileng, O bile o ba tlotsitse," ntho eohole e se e batalalitsoe.

<sup>28</sup> 'Me ha u nka motho ea sa lumeleng hore Moea o Halalelang o etselitsoe letsatsi, na le bona seo ba se etsang? Ba latola Letšoao e leng sesupo se reng u khomahantsoe le Sehlabelo sa hao. Le bona seo ke se bolelang? E bonolo haholo ha u e sheba ka—ka mokhoa oo Molimo o e ngotseng joale. Mali a re jere 'me re ne re... ho bontša e—e sesupo sa Moea o Halalelang, boo ke Bophelo.

<sup>29</sup> Joale, bophelo ba phoofolo bo sitiloe ho khutlela ka ho motho, hobane ba ke ke ba tšoana, bophelo ba phoofolo ha bo na soule ho bona. Bophelo ba motho bo na le soule. Phoofolo ha e itsebe e le feela. Ha e tsebe botle le bobo. Eéna, o mpa feela... E na le e—e seperete, empa e sang soule. Joale le hopole, joale, soule ke tlhaho ea seperete, ehlile.

<sup>30</sup> Joale sheba, empa ha Bophelo ba Sehlabelo sa rōna, Jesu Kreste, eitseha Mali a Hae a tšolloa. E ne e le Molimo, o koaletsoeng ho Monna a le mong. Joale, O theohile ho tsoa ho ba Jehova, ho Itsebahatsa e le ngoana oa motho, ho Inkela sebopheho sa motho, ho re tsebahatsa le Eéna. E ne e le Konyana ea Molimo. 'Me ka ho Eéna, moo Mali...

<sup>31</sup> Joale ke a tseba motho o re, “E ne e le mali a Bojuda.” Le utloa Bajuda ba rialo. E ne e se mali a Bojuda, hape E ne e se mali a Molichaba. E ne e le Mali a Molimo. A se na Bojuda leha e le . . . E ne e se Mojuda leha e le Molichaba. E ne e le Molimo. “E—e—e moroetsana o tla emola.”

<sup>32</sup> Joale, ke tseba lōna batho ba bangata le Maprotestanta le hopola lehe e le la Maria. ’Me e—e hemotlelobini e tsoang, bophelo bo kena seleng ea mali. Hobane, sethole se ka alama lehe, ha se sa kōpana le nonyana e tona, se ke ke sa qhotsoa, hobane ha se a nona. Bophelo bo tsoa mophuleng oa mali, a tsoang ho e tona. Empa lebakeng lena e tona ha e eo, ka hona, “bophelo bo maling,” bo ile ba tlameha ho tsoa ho Molimo a inotši, ’me O bopile sele ea Mali popelong ea Maria. Molimo ka Sebele, ’Mopi ka Sebele, o bopile sele ea Mali. Joale shebang. Ba re, “Be, e ne e le ’mele. Maria o ne a tšoere lehe.” Che, monghali. Ha a ba joalo; ha ho lehe. Haeba e ne e le lehe, ha u theole sepeme maikutlo a le sieo. ’Me haeba Oona, tšali a fihletsoe ke maikutlo, u etsisa Molimo eng?

<sup>33</sup> O bopile lehe le Mali. Ke hantle seo A neng a le sona. “Re ile ra tšoara Molimo,” Bibele e boletse. Timothea oa Pele 3:16, “’Me ruri sephiri sa borapeli se seholo: Molimo o bonahetse nameng. Re Mo tšoere ka matsoho a rōna.” ’Mele oo e ne e le Molimo. Ruri, e ne e le eona. E ne e le Molimo kahohle, ka sebopinho sa ngoana motho.

<sup>34</sup> Joale mona re a elelloa tabeng ena, sele eo ea Mali e a pshatloa, e lokolotse Molimo. “Molimo o no o le ho Kreste, o busetsa lefatše ho Oona.” Athé, ha ho e mong ea neng a ka etsa hoo, ho se letho le ka etsoang; e qositse Mali a halalelang ao, ka Seqo. Molimo oa na oa tlameha ho theoha ho fetoha motho, ho utloa bohloko ba molao oa Oona ka Sebele. Haeba Jesu e ne e le moporofeta feela, monna ea hosele le Molimo, ekaba Molimo ha o a lōka.

<sup>35</sup> Ha nka re, “Moena Grant a shoelle sebe seo Billy a tlamehang ho se shoela, kapa ntho and itseng, kotlo ea mofuta,” ha se tōka eo. Ha nka bolaela moshanyana oa ka kotlo e lihiloeng ke ’na, e sa ntse e se tōka. Nka etsa tōka e le ’ngoe feela, ke ho mo emela sebaka, haeba ke batla ho mo pholosa.

<sup>36</sup> ’Me Molimo oa na oa tlameha ho fetoha nama, ho nka sebaka sa moetsalibe; Molimo o bonahalitsoeng nameng, e se letho le katlasana ho Molimo ka Sebele. Joale, E ne e le enoa, o bonahetse nameng, ho tlosa libe tsa lefatše. ’Me Oa Itsebahatsa ka ho rōna, re tle re tsebahatsoe ka ho Oona. Na le bona morero oa eona?

<sup>37</sup> Joale re fumana boitsebiso ba rōna ’moho le Sehlabeled sa rōna, Bophelo ba Sehlabeled ka ho rōna, e leng Moea o Halalelang. Eitseha ha sele eo e pshatloa, e lokolotse Molimo, ho lokolla Molimo, O halalelitse batho ka Mali a Oona ka Sebele le ho boela

a beha Molimo ka ho motho hape. Molimo ka ho lōna, Bophelo Bosafeleng!

<sup>38</sup> 'Me moithuti ofe oa Segerike o tseba lentsoe leo, Bophelo Bosafeleng, le tsoa ho lentsoe Z-o-e, *Zoe*, e bolelang "Bophelo ba Molimo ka Sebele." Ke hantle. Mokhoa feela u ka ruang Bophelo le ka mohla, sebopeho sa Bophelo Bosafeleng se seng feela, 'me ke Bophelo ba Molimo ka Sebele ka ho uena. Le a bona? Ke moo u ruileng Bophelo Bosafeleng, hoba e le Oona feela Bosafeleng bo leng teng. 'Me re litholoana tsa mehopolo ea Oona, le pele ho motheo oa lefatše kapa le letho. Hona hohle ke monahano oa Oona feela, 'me rōna re pepeso ea mehopolo ea Oona ea seo e neng e le sona.

<sup>39</sup> 'Me Oa na oa tlameha ho theoha ho tlosa sebe. Ho se ea ka e etsang. Ho se ea nang le tokelo ho e etsa. Ho se ea ka e etsang haese Eéna, 'me O e entse. 'Me eitseha Bophelo boo bo lokolloa 'meleng oo, Monna, e beng e le Mora oa Molimo; matla a Oona a a bopang a ahile moaho, joaloka rakontraka ofe, ho aha moaho oo A keneng ho ona, ka Sebele. Molimo o entse hoo.

<sup>40</sup> 'Me eareha bophelo boo bo tlosoa, Mali, khemistri ea Ona, e tšolohetse fatše, joalokaha a Abele a tšolohetse fatše. Empa Maling ao ho tsoile Moea o Halalelang oa Molimo, oa ntoo romelloa motho ka Letsatsi la Pentekosta, ho etsoa setlama le Sehlabelo se ba shoetseng. Ha mokhoa o mong le ka mohla lefatšeng oo re ka e fumanang. Letšoao le tiileng!

<sup>41</sup> Shebang, holane u le molato oa lefu, 'me u tsebile o isoa setulong sa motlakase. 'Me hopolang, ho latola . . .

<sup>42</sup> Dallas, mamela! Ho hana Mali a Jesu Kreste, Letšoao la Mali a Hae, ha u Le bona 'me u Le hana, u tla tjamelka Kahlolo ka Mali a Hae matsohong a hao. Moetsalibe, setho sa kereke, hopola seo.

<sup>43</sup> Holane Lee Oswald a khonne, matsatsing a 'maloa ao, le ho hula ka thata a tjamelane le Lekhotla la Suprimi; etsoe a tsebile, ka ho fenetha Mopresidente, ho ke ke ha ba le thojana ea mohau, kamoo monna eo a ikutloileng kateng! E tlamehile ebe ebile ntho e harolang letšoalo. Ha a ka a tobana le eona, hobane o thuntsoe ke mothaka e mong. Empa nahana ho lula mono pel'a Lekhotla la Suprimi le befileng, ka mali a mohaeno letsohong la hao, Mopresidente oa Linaha tse Kōpaneng! E tla ba nthoana e chatsi, ho lōna batho ba fetang Mali a Jesu Kreste mohoalotso, mohla u emang makhotleng a Molimo. Ho hula ka thata athe u tsebile. Oswald a ke ke a etsa letho haese ho falla bophelong bona, empa Molimo o u leleka Pontšeng ea Oona ka Bosafeleng. E tla ba ntho e harolang letšoalo. Lemohang.

<sup>44</sup> Holane oa tlameha ho atamela makhotla, u le molato, u ka ipatlela leqoetha le khabane le leng teng. Mang le mang a ka etsa joalo.

<sup>45</sup> 'Me monna e mong le e mong ea tsoetsoeng lefatšeng, ha ke tsotelle lelapa le khabane leo a tsoileng ho lona, o molato oa Mali

a Jesu Kreste hofihlela a amohetse teballo ea eona. 'Me mokhoa o le mong oo u tsebang hore teballo e lōkile, ke ha Letšoao le Itulela holim'a hao, 'me u ruile Letšoao.

<sup>46</sup> Lemohang, u molato, 'me u tla tsoma leqoetha le khabane le ka rapelisisang nyoe e a hao. 'Me holane ke habile Kahlolo ea Molimo, ha ke batle moprista oa letho, ha ke batle motho oa letho; ke batla leqoetha le khabane le ka fihleloang ho buella tsekoo ea ka.

<sup>47</sup> E re ke u bolella taba, uena, motsoalle oa ka oa Mokreste. Leqoetha la rōna ebile ke moahloli oa rōna, 'me moahloli oa rōna—oa rōna o fetohile leqoetha la rōna. Nyoe e tšolotsoe ha re amohela teballo ea Hae. Moahloli ka Sebele o theohile ea eba leqoetha, 'me leqoetha le moahloli ke Motho a le mong. Molimo oa fetoha motho, hore ka lefu la Oona ka Sebele leo O le behileng holim'a hae O tle o behe motho ea lōkileng. Alleluia! Hoo ho bolela, ho bokoe Molimo oa rōna! O lōkeloa ke lithoriso tshole. Moahloli oa rōna le leqoetha la rōna ke Motho a le mong.

<sup>48</sup> Moea o Halalelang ke Letšoao le reng re lebaletsoe. Nyoe e qhaliloe. Ho monna le ho mosali e mong le e mong ea amohetseng kolobetso ea Moea o Halalelang kannete, o lekiloe, o entsoe setlama le leqoetha la hae, le moahloli oa hae, le sehlabeled sa hae, 'me Letšoao leo a le ruileng le supa hobane leeto la hae le lefeletsoe ho ea Khanyeng. Amen. Ho felile. O tšoere Letšoao leo. Ke la hae, kolobetso ea Moea o Halalelang, e leng bopaki ba tsoho ea Jesu. Amen. Le a e lumela na? [Phutheho e re, "Amen."—Mohl.] Ke boitsebiso ba hao boo, u tšoere Letšoao.

<sup>49</sup> Joale ha u sa tšoara Letšoao leo, u ke ke ua kena. U tšoanelo ho tšoara Letšoao. Ke moputso o hlokoang oo, "Ke tla bona mali, mali ke letšoao. Ke tla bona mali, Ke le fete." U tšoanelo ho fumana Letšoao. Ha u sa etse, khele, u ke ke ua ea. U tlameha ho tšoara Letšoao.

<sup>50</sup> Ha letšoao le sa pepesoa, letšoao le sa pepesoa tlase mane, esita le selekane se ne se hlakotsoe. U re, "Be, joale, Moena Branham, joale bea butle motsotso." Ke hantle haholo.

<sup>51</sup> Letšoao le ne le okametse selekane. Hoba selekane sa Israele e ne e le ho bolla, 'me Mojuda ofe o ne a ka tšoa a bontša motho ofe, "Nka u kholisa ke bolotse, ke Mojuda, ke bolotse ho latela molao oa Jehova," empa taba eo ha e mo latolele ha letšoao le le sieo mono hape. O tšoanelo ho pepesa letšoao. Le a e tšoara na? [Phutheho e re, "Amen."—Mohl.] O... Letšoao le tlamehile le be teng, leha ho le joalo. 'Me haeba u balloa selekane... Hola Mojuda ofe a ka re, "Ha ke tšase mali a letho monyako oa ka, nka kholisa hore ke Mojuda oa selekane," Lengeloi la lefu le ne le mo tšoara. Ho sa tsottelehe botšepehi ba hae bo bokakang, e le setho se se kakang sa kereke, o lefile karolo e kae ea lesosome, kamoo a ipoletseng a lumetse Jehova; Jehova o batlile letšoao leo.

<sup>52</sup> 'Me O e etsa le kajeno, hape. Ke tlameho. Le tšoanetse joalo, "Hoba ha ho tsela e 'ngoe tlasa Leholidō, ha ho lebitso le leng le filoeng ka mokhoa ofe," ho sa tsotelehe ho lōka, le botšepehi bo bokae. Letšoao leo le tlameha le be teng, ho pepesoa.

<sup>53</sup> "Mali," u re, "be, ke hlabile konyana ke a tšetse mohopeng. Ke a behile motšeо mona." Ha se seo O se buileng. A tšoanelā ho tlotsa koseneng le nqalong ea monyako. A tlameha ho pepesoa.

<sup>54</sup> Le bophelo ba hao bo tlameha ho pepesa hore Letšoao le ka ho uena. Oh, lōna Mapentekosta, molato ke ofe ka lōna? Moriri o ponngoeng, lifahleho tse takiloeng, monna, mesoaso e litšila le lintho, se kae sesupo seo se reng Mali a Morena Jesu Kreste oa ka ke Letšoao la Moea o Halalelang? Lōna, ba nang le sebopinho sa borapeli, 'me le e bitsa "boupelli" le eng esele, mesebetsi ea Molimo, "boupelli." Le pepesa letšoao joang?

<sup>55</sup> Ba re, "Ke Mopente- . . ." Ha ke tsotelle seo u leng sona. "Ke Mobaptise. Ke Mopres- . . ." Ha ke tsotelle seo u leng sona. Letšoao leo le tlamehile le be teng mono. Molimo o a Le hloka, le letho lesele haese seo.

<sup>56</sup> U re, "Be, ke tšoere tsa bongaka." Ha ke tsotelle bokae ba ligarata tsa hao. Molimo o hloka Letšoao leo, 'me Hoo feela. Ke sesupo se reng tsela ea hao e lefeletsoe. A ke ke a amohela litšoanelo tsa hao kapa eng esele. O tlameha ho fumana Letšoao leo.

<sup>57</sup> Moqhobi oa bese o re, "Mona, bea butle, ha se letšoao la ka leo."

<sup>58</sup> Monna oa sefofane o re, "Be, tsoa le mono hona joale." Tekete ke letšoao. U tsoela mono 'me u bolella moqhobi, "Mona, ke batla ho palama sefofane sa hao. Ke bokae?"

"Kena u itholle letšoao."

"Oh, ke tla u lefa."

<sup>59</sup> "Ha ke e amohele. Ha u palame sefofane sa ka pele u lefa theko u thotse letšoao. Ke batla letšoao."

U re, "Be, ke kene sekolo. Ke entse *sena*. Ke . . ."

<sup>60</sup> Ha ke tsotelle seo u se entseng, u tšoanelā ho thola Letšoao ho seng joalo ha u palame. Amen hape amen. Na ha le bone? Molimo o hloka Letšoao leo. "Ke tla bona mali, 'me Ke tla le feta holimō ha Ke bona letšoao."

<sup>61</sup> Le ne le sa pepesoa, selekane se hlakotsoe. Mojuda a ka bolela ruri a itšupa e le—e le Mojuda ea bolotseng, a ka biletsha baena kantle a re, "Bonang mona, ke bolotse." E ne e sa bolele letho.

<sup>62</sup> U re, "Ke Momethodise. Ke Mobaptise. Ke Mopentekosta. Ke *sena*. Ke *sane*." Ha e bolele ntho le e 'ngoe.

<sup>63</sup> U tlameha ho tšoara Letšoao. 'Me ha Letšoao le fihla, Le paka Kreste. O itse Le tla etsa hoo. 'Me Kreste ke Lentsoe. 'Me u ka latola joang ho re Bibele e lōkile, karolo ea Eona, 'me u

ipolela u tšoere Letšoao, athe Letšoao ke bopaki ba Jesu Kreste? Le a bona, ke ipotsa taba eo.

<sup>64</sup> “Oh,” ho re, “ha ke lumele, ke lumela matsatsi a mohlolo . . .” Oh, ela hloko, ha ho Letšoao mono. Letšoao le omela Lentsoe le leng le le leng ka “amen,” sohle, hoba ke Molimo ka Bolona. Le a bona? Ke hantle.

<sup>65</sup> Empa ha letšoao le ne le le sieo mono, selekane se ne se hlakotsoe. Se phumutsoe. Le joale ho a tšoana! Ho sa tsotellehe u bolela hakae—hakae, u ka rialo hakae, “Ke lumela Lentsoe ka leng Bibeleng,” ho re, “Moena Branham, nka—nka qotsa halofo ea Bibebe eo, Bibebe eohle, ka hlooho. Ke lumela karoloana ea Eona eohle.” Ke botle. Satane o etsa joalo, le eéna. Uh-huh. E cosa Letšoao!

<sup>66</sup> “Be, Moena Branham, lebota la ka le tletse ligarata. ’Na ke Mabachulara oa Art, ’me ke apere ligarata tsa bongaka, le LLD. ea Selatini. ’Me, oh, ke ngotse libuka. Ke entse sena. Ke entse sohle. Ke—ke entse lintho tsena tsohle.” Ha ke tsotelle. Hohle hoo ke botle, empa u sa tlamehile ho fumana Letšoao le joale. Letšoao, le joale ho sa batloa Letšoao!

<sup>67</sup> U re, “Ke mothuti oa Bibebe. Ke e—ke motho ea lókileng. Ke sena, sane.” Taba eo e ka ba e lókile, hoo hohle ho hotle, empa Letšoao le tlameha le be teng!

<sup>68</sup> Joale, lefu keha le le mothating oa ho otla Egepeta nako efe, le joale lefu le mothating oa ho otla sechaba nako efe.

<sup>69</sup> Anna Jeanne, ke ikutloa joaloka ntatao, o buile khetlo le leng. Haesale ke e ratile. O itse, “U a tseba, sechaba sena, ka tsona libe tseo, ha Molimo o ka lesa Amerika ho phomella ka boitšoaro ba eona, O tlanngoe maoto le matsoho ho tsosa Sodoma le Gomora le ho itlhonamela tsona, ka ho li chesa lore.” ’Me ke eona.

<sup>70</sup> Hopolang, Iseraele o phetelitsoe sebe ka seng sa hae, le rōna re tla ema moo. Re eketsa ho hlephakakang? Tiisang lihlomo! Khutlelang ho Molimo, kereke! Lintho tsena ha li boleloe ho fapano. Ke le bolella e le temoso. Le lumele!

<sup>71</sup> Lefu le ne le le mothating oa ho otla. Molimo o kile oa ba bontša mohau oa Oona le lerekö la Oona, ka matla le lipontšo le meeka (le kajeno O e entse pele Kereke e ntšuo), le joale ba lakalitse ho se bake le ho lumela molaetsa.

<sup>72</sup> Le a bona, molaetsa o hlahile pejana kereke e ntšuo. E tlameha joalo kamehla. Ho a tšoana joale. Ketsahalo ka ’ngoe ea moea ke pontšo e tšoang ho Molimo. Na le lumela seo? [Phutheho e re, “Amen.”—Mohl.] Joaloka Molaetsa, ke pontšo ebe Molaetsa o sala pontšo morao. Molimo o boleletse Moshe, ho re, “Etlareha ha ba sa lumele puo ea pontšo ea pele, ekaba ba tla lumela puo ea pontšo ea bobeli.”

<sup>73</sup> Joale, ha le bona lipontšo li hlaha, li sa lateloe ke molaetsa, e sa ntse e le sekolo sa khale sa thutabomolimo ho theoha joalo, ha e a tsoa ho Molimo. Empa pontšo ha e hlahisoa, e hlahlangoa ke Molaetsa. Joale shebang. Jesu o fihlile temeng . . .

<sup>74</sup> Na ke le koala litsebe? Motho ea sebetsanang le maeke ona mona, molumo o batla o khutla. O batla o phahame. Ke batla le o lōkise.

<sup>75</sup> Jesu mohla a neng a fihla temeng, ha A bua le batho haholo, mang le mang o Mo batlie kerekeng ea hae. "Oh, Moporofeta e mocha enoa, re thabile haholo feela ho Mo fumana." O ne a folisa bakuli. "Oh, khanya ho Molimo. Molimo o hlahisitse Monna e moholo har'a rōna." E ne e itōketse. Eaba tsatsi le leng e fihla moo . . . E ne e le pontšo ea Hae eo.

<sup>76</sup> Esaia 35 e boletse e tla ba pontšo. "Liritsa li tla thala joaloka khama," le joalo, "lifofu li tla bona." E ne e le pontšo.

<sup>77</sup> O bontšitse pontšo ea Hae joaloka Messia, le joalo. 'Me bao, bongata ba bona, ba itse, "E, nka amohela seo." Be, joale, haeba e ne e le pontšo eo, puo ea pontšo eo e tlameha e be teng. Puo e e hlahlamang e ne e le efe? Eitseha A qala a ruta thuto ea Hae ho ba bitsa sehlopha sa linoha har'a joang. Ha A hlotse a tumme ho tloha mohlang oo, le a bona, mohla puo e ne e khemisana le pontšo. Pontšo e hlahile pele.

<sup>78</sup> Moshe o theohile a kena Egepeta ka pontšo. A lahlela lere la hae fatše, la fetoha noha. E ne e le pontšo. Empa hamorao, puo ea hlaha e khemisana le pontšo. Eaba ho fapane. Le a bona, ha ba batle seo. E—e puo, e tšoanetse, ho sala pontšo morao. 'Me e ke ke ea hlaha nakong efe haese nakong eo, hoba ho fihlile nako ea Mangolo ho phetheha. Shebang seo A 'moleletseng sona, sehlahleng se tukang, "Ke bone melumaelo le ho utloa batho ba Ka, le ho bona lilihloriso tsa bona ke batubi ba Egepeta, 'me Ke hopola tšepiso ea Ka eo Ke e baletseng Abrahama." Ho se ho tlotse lilemo tse makholo a mane, 'me O boleletse Abrahama ba tla lula tlase mono. Le a bona, e ke ke ea hlaha nakong esele. Moshe a tlameha ho fihla nakong eo hantle feela.

<sup>79</sup> Tšupanako e khōlō ea Molimo e otla ka phetheho. E ke ke ea potlaka ka motsotsa leha e le ho salla morao ka motsotsa. E tla otla nako botsekeng hantle. Be, ka hona, le a bona, tsohle li ne li imathela hantle feela, e ke ke ea fihla linakong tse ling.

<sup>80</sup> Le lintho tsena li ne li ka sitoa ho hlaha linakong lisele. Sena se ne se ka sitoa ho hlaha matsatsing a Luther. Se ne se ka sitoa ho hlaha matsatsing a Wesley. Matsatsing a Mabaptise kapa Mamethodise, matsatsing a bona, e ne e ka sitoa ho fihla. E tlameha ho hlaha joale. Iseraele e tlameha e be e le sechaba. Likereke li tlameha ho tšoana le hona joale. Molaetsa oa borarō o ne o tlameha ho fihla, mongoaha oa kereke ea borarō. Laodisea e ne e tlameha e be teng. E ne e ke ke ea ipopa pele Pentekosta e fihla e hlekemana, le ho tsoa le ho hlaphisa, le ho etsa seo ba

se entseng. Ebe moo e tlamehang ho fihla, Morena a ntoo fihla, mohla ba Mo ntšetsang kantle ho kereke. Ke Lentsoe.

<sup>81</sup> Ba tšaba ho qholotsa Lentsoe leo nqa efe. Ba hlile ba ikhutsetsa haholo ka Lona, empa feela ba pheha khang ka eona.

<sup>82</sup> Chicago, ha se khale mona, ha Morena a mpontša pono. E le ha ke tšoere bareri ba makholo a mararō tlase mono. Ka re, “Joale ke tseba seo le . . . Mabapi le peō ea noha, le joalo-joalo,” ka re, “e mong oa lōna a tšoare Bibele ea hae a tl’o bapa le ’na a e hanyetse.” Sehlopha se khutsitseng ho fetisa seo u kileng oa se utloa. Ka re, “Nkhatoheng mokokotlo ha ho le joalo.” Le a bona, e sita sekolo sa monahano oa bona.

<sup>83</sup> Koana, ba re, “Moena Branham ke moporofeta ha a tlotsitsoe, empa ha tlolo e mo tlohetse, oh, ha ke tsebe.” Ha se le e . . . Haeba seo e se sekai sa e—e—e—e moithuti ea hlakaneng oa thutabomolimo! Lōna e . . .

<sup>84</sup> Lōna lentsoe *moporofeta* le bolela “mosenoli ea Khetheleng oa Lentsoe.” Lentsoe la Morena le tlela baporofeta. Ke kamoo Jesu a supiloeng kateng. ‘Me kamora tsoho ba buile, ba itse, “Re tseba hoba E ne e le moporofeta oa Molimo, le a bona, hoba ho se motho ea ka etsang lintho tsena Molimo o se ho eéna,” feela ha ba amohela molaetsa oa Hae. Ha ba amohela Johanne, athe e ne e le moporofeta. Ha ba amohela Elia, ha ho mang oa bona, athe ba ne ba tšoere tšenolo e Khetheleng.

<sup>85</sup> Lentsoe, lentsoe la Senyesemane, *moporofeta*, mantsoe a Senyesemane a ka bolela eng le eng, le bolela “moreri.” Empa ha u bua ka *moporofeta*, oa Bibele ea khale, e ne e bolela “seboni.” ‘Me litšanelo tsa hae e le, tseo, seo a se boletseng se etsahetse, e le pontšo ea hoba ke moporofeta; eéna hape e le pontšo ea hore o tšoere tšenolo e Khetheleng ea Lentsoe le ngoliloeng. ‘Me Molimo o e thasisetsa, ka mora hae, le ho e kholisa.

<sup>86</sup> Joang? Be, e tlameha ho ba tjena feela, ke phetho. Ha ho mokhoa oa ho e koekoetla. Molimo o e boletse e tla ba joalo, ‘me ke moo. Empa ke eo kajeno, le a bona, Letšao leo le tlameha le be teng mono, le tsebahatsang Lentsoe leo le le ’netefatsa ruri. Le kamoo O tšepisitseng, kamoo O hlophisitseng batho bohle ba Oona ba lefatše la pallo, joale, mohla O neng o tla thakhola exoda ena, eona e le papiso.

<sup>87</sup> Joale ke tla leka ke be ke tsoile metsotsong e meng e ka bang leshome le metso e mehlano, mashome a mabeli, ka Molaetsa. Lemohang ka hloko joale, ke batla le tšoare sena, hoba nka tšoha ke sa le bone hape, le a bona.

Lemohang, joale shebang kamoo O hlophisitseng batho ba Oona kateng.

<sup>88</sup> Ba bakae ba O tsebang o sa fetole litsela tsa Oona le ka mohla? Le ka mohla ha O etse joalo. [Phutheho e re,

“Amen.”—Mohl.] O a . . . joale shebang ho haola le Bibele ho bona haeba O e fetotse le ka mohla. Che, monghali.

<sup>89</sup> Ebe O hlophositse batho joang? Pele, O rometse moporofeta ka pontšo, eéna e le Moshe. Na ho joalo? [Phutheho e re, “Amen.”—Mohl.] ’Me pontšo e tšoere molaetsa, molaetsa oa ho “itlhophisa,” ba tla tsoa ba ea lefatšeng la pallo. Hape A qhoaetse boitsebiso, ba moporofeta enoa, Leseli le le holim’ a hae. Topallo ea Mollo e latetse moporofeta enoa, re tseba seo, e haotse nahathote le Moshe. Re elelloa seo. Hape O ba file letšoao e le kholiso ba tle ba se tšohe, ho ferekana kahohle ba le ho tšoaroa ke linerefe; teng O itse, “Ke tla bona letšoao leo, Ke le fete holimō.”

<sup>90</sup> Shebang kamoo O sebelitseng joale. O hlophositse pontšo pele, moromuo, molaetsa o supiloeng, boitsebiso ba moromuo, le letšoao la kholiso le reng tsela e lefeletsoe. Ba habile lefatšeng la pallo.

<sup>91</sup> Ntho e tšoanang O e entse kajeno! O ile oa etsa’ng? O re romeletse Moea o Halalelang. Moea o Halalelang ke Moromuo, ’me boitsebiso ba Oona ba Mangolo bo Mo tsebisa har’ a rōna, eéna maobane, kajeno, le kamehla. ’Me Letšoao ke kholiso. Re tšohile eng? Theko ea leeto la rōna e lefuoe ’me re entsoe setlama le Sehlabelo sa rōna. A ke ke a u latola. O tšepisitse seo. Re entsoe setlama.

<sup>92</sup> Israele e tsoang Egepeta, ke boletse, e tšoana le—le Monyaluo ea tsoang kerekeng. Mohla Moshe a qalang bosebeletsi ba hae, Israele eohle ea phutheha Goshene, thapelong le ho khumama, ruri, ho tsoa ka makhalo ohle a Egepeta. Le Monyaluo o tla etsa hoo, e tla tsoa hohle ho Oneness, Twoness, Threeness, le mefuta e meng eohle. E tla tsoa. E tlamehile. Joale re bala mona ho Baheberu e . . . Rōna joale, ntho ea pele eo re tšoanelang ho e nahana, ho tsoa ka makhalo ohle, “Tsoang har’ a ho se lumele.” Joale Moea o Halalelang o tšepisitse ho bitsa seo matsatsing a qetelo, “Tsoang har’ a bohle ba sa lumeleng.” Lemohang.

<sup>93</sup> Re fumana ho Baheberu 10:26, ke ngotse fatše mona, e bua sena, “Ha re etsa sebe ka boomo ha re se re fuoe tsebo ea ’Nete, ha ho sa le sehlabelo sa sebe,” le a bona, ha u sa lumele ka boomo.

<sup>94</sup> Joale ha u ka elelloa, seo nka se buang mona, ha le ka ’mamella nakoana hofihlele ke taká setšoantšo seo. Ke utloile Moeeng, e sa feta ka tšoanelo. Le a bona? Lemohang.

<sup>95</sup> Bahaberu ke bana, ba leetong la bona le tsoang. Molimo o khethile monna ba le leshome le metso e ’meli, kapa Moshe, ka letsoho la Molimo, ho tšela le ho hloela lefatše; le ho khutla, ho khutla le letšoao la lefatše. ’Me ha ba fihlile mono, ba leshome ba bona ba harohile letsoalo ho shoa. “Khele,” ba itse, “Baamaleke bao holimō mono, re tšoana le litsienyane ho bona.” Joshua le Kalebe ba khutlile, ho tlisa bopaki, “Re ka khona!”

<sup>96</sup> Le a bona, ke balumeli ba moeli bao. Ba fetile hara lielemente tsena tsohle tse fapaneng, le ho feta kerekeng, le ho joina kereke, le likolobetso le libopehong. Empa ha ho fihloa moo ho tšeloang hantle ho fumana Letšoao, bopaki ba hore Lefatše le teng, Bophelo boo... Jesu Kreste ha a shoa. Ke daemenshene e 'ngoe. O phela ho eona. O na le rōna, O ka ho rōna joale. Ha ho fihloa mono, "ah," ba sitiloe ho e lumela. E ne e ba sita haholo, le a bona. 'Me ba khutlile, 'me bao, e mong le e mong, ba shoetse nahathote, ha ho le a mong oa bona ea tsetseng. 'Me, le a bona, haeba re sa lumele, rōna Mamethodise, Mabaptise, Presbeteriene!

<sup>97</sup> Hola mosuoe oa ka oa khale a lutse mona kajeno. Ngaka Roy E. Davis, bongata ba lōna le a mo tseba, hantle mona Fort Worth, a ka tšoha a lutse ka mona. Ke sa hopola re qoqa ka lintho tsena, lilemong tse ngata, ngata tse fetileng. O nkolobeletse tumelong, kereke ea Missionary Baptist.

<sup>98</sup> 'Me shebang, ka mona, joale, haeba re... ha—ha re fihla moeling oo oa lefatše, ho re, "Be, khanya ho Molimo, ke buile ka maleme, alleluia." Ha se eona. Haeba u ka re, u sa lumele Lentsoe lefe leo, phoso e teng boiphihlelong ba hao. Le a bona?

<sup>99</sup> U fihla hantle pel'a Lefatše u le bona le le teng mono. U bona Jesu a tsohile. O har'a rōna. U utloa Lentsoe le salang molaetsa morao, 'me le joale ha u Le lumele, u tseba se etsahala'ng? Ba shoetse hantle nahathote. "Ha re etsa sebe ka boomo ha re se re filoe tsebo ea 'Nete, ha ho sa le sehlabelo se seng sa sebe." Ke seo Buka ea Baheberu e re bolellang sona.

<sup>100</sup> 'Me joale shebang, e re re sa bona lipontšo tse khōlō tsa nako ea qetelo lefatšeng, tseo A li tsepisitseng, ke temoso e kakang ho rōna e reng nako e atametse. Lesang ho se lumele. Phuthehang 'moho. Re tlameha ho ratana le ho lumela, le ho ikarola lefatšeng.

<sup>101</sup> Lemohang, ba ne ba sa phutheha 'moho feela ho qoqa ka molaetsa. Ba ne ba tli'l'o kena ho ona, ho kena tlas'a mali. Ha se ho tla ho re, "U a tseba, Moshe o re boleletse. Moromuo, o itse, o re itse re tlameha ho nka mali. Le nahana'ng ka eona, bashanyana?" E ne e se eona. Hlaba konyana, beha mali holimō mane!

<sup>102</sup> Re ka tla ra lula ra lumellana ka Lentsoe, le sohle, feela Letšoao leo le le sieo, ho re thusa ka'ng? Ha ho molemo. Kena tla'sa Lona. O ne a sa jara boikarabelo ba mang ea seng tlas'a mali ao. 'Me ha A jara boikarabelo ba motho mang, kajeno, ea leng kantle tlas'a Letšoao.

<sup>103</sup> Lelapa lohle, le bolokehile feela tlas'a letšoao, 'me letšoao le ne le pepesoa. Lelapa lohle! Na le lumela seo? [Phutheho e re, "Amen."—Mohl.] Kajeno re tlameha ho hopola seo, batho. Bana ba rōna!

<sup>104</sup> 'Me bosaoana bona ba chacha e ncha le rokon-rolo, le lintho tse re fetang ho tsona, le lintho tsena tsohle tsa li-Beatles le li-

bugs, ana le tsebile li tšoantšitsoe ka Bukeng ka mona, ea Bibele? E rialo ho Tšenolo. Ruri, e bo. Kamoo batho, bao, ba a—ba a . . . bao, bao, le a bona, bao, ha ba . . . Ba shoele. Ba ke ke ba tsoha. E ne e se ba Bosafeleng le ka mohla. Ba ne ba le sieo le Mohopolong, ka hona ba tla timela. Ba tla fela kamehla, ho timeletsoa ka botlalo. Ba tla ahlola ka li-aeonse tsa nako, ka baka la seo ba se entseng, empa sohle se bileng le qalo se na le qetello.

<sup>105</sup> Ke se se nang qalo, se se nang qetello. Sebopého sa Bophelo Bosafeleng se seng feela. Sebopého se le seng sa Bophelo Bosafeleng, re hahamalla seo. Lemohang.

<sup>106</sup> Joshua, khaolo ea 2 ea Joshua, seotsoa se lumelang sa Molichaba se ne se utloile, le lelapa la sona, le ho ba kenya tlas'a khole e sekarelata, eona e le letšoao le tsoang ho baromuoa ba Joshua. Lengeloi la Molimo le senyang le hlomphile letšoao leo, lona feela, motseng oo. E ne e le tlhoko ea Molimo, ka bahlanka ba Oona, e reng Molimo o hloka letšoao lena, 'me e le lona feela. Ha ke tsotelle haeba e le ramotse, haeba e le monna ea halalelang ka ho fetisa motseng, haeba ba kene kereke e khōlōhali motseng, sohle se motseng se helehile haese ntlu eo. Molimo, o inotsi, oa hlompha letšoao leo.

<sup>107</sup> Lemohang, Jeriko e utloile ho thoe Molimo o etsa likhōlō, feela ba lesitse ho nka temoso.

<sup>108</sup> Le kajeno batho ba utloa seo Molimo esale o se etsa lilemong tse 'maloa tse fetileng, feela ha ba nke temoso. Matla a maholo ana a mohau le lipontšo, joalokaha A tsepisitse, "joaloka matsatsing a Sodoma, ho tla ba joalo." Kamoo A tsepisitseng ntho eo e tla ba kateng! Shebang se etsahetseng Sodoma. Hopolang, pontšo ea Sodoma e ne e le eo. Empa moromuo, oa Malakia 4, ke ho "busetsa lipelō tsa bana ho bontate, bontate ba pentekosta, morao Bibeleng." Bibebe e 'ngoe e ke ke ea hlola e-ba teng, ntho e 'ngoe ese. Ena ke tšenolo e tletseng ea Molimo.

<sup>109</sup> 'Me motho e mong o re, "Be, ke lumela karolo *ena*, ha ke tsebe letho ka Seo."

<sup>110</sup> Moromuo, oa Molimo oa makhonthe o u sokollela morao Nthong eo eohle! Le a bona? Lemohang, ke seo Moea o Halalelang o se etsang, ho u busetsa hantle Lentsoeng la Molimo le leng le le leng.

<sup>111</sup> Mohau oa Oona o ne o supiloe, kahlolo ea Oona e tla latela. Ba tšoanetse ba be ba lumetse hore ba bolokehile meahong ea bona e meholo ea malumeli a mono Jeriko, empa ba e fihetse e sa sebetsa.

<sup>112</sup> Ba bang ba tšoanetse ba be ba . . . ekaba ba kene ka mokhoa o itseng, mono ha kena bashanyana ba 'maloa, le ho laela ho phutha peō eohle e reriloeng 'moho. 'Me o ile a fumana . . . le ho sebelisa ntlu ea hae e le kereke, le ho amohela baromuo; le ho kenya bohole motseng oa habo, ba tlang ho lumela, tlas'a letšoao.

<sup>113</sup> Mosali a le mong moruong o moholo oo o le mong! Mosajana a le mong, a bile a nyehlile mekhoa, mohlomong a bile a khaotsoe kerekeng e 'ngoe le e 'ngoe motseng, empa o lumetse moromuo a eo. 'Me moromuo a eo a siea letšoao, pontšo, 'me Molimo oa hlompha letšoao. Ho a tšoana le kajeno. Hopolang feela, eitseha motimetsi oa khalefo ea Molimo a fihla, tsamaiso e khôlô eo ea heleha, letšoao le bolokile ntlu ea hae ka polokeho. Ha se hobane e ne e le mosali ea lôkileng; kahobane a bile le tumelo 'me a sebelisa letšoao.

<sup>114</sup> Joale haeba a itse, "Yaa, ba ne ba lôkile monna eo, ruri ke thabetse molaetsa oo ba o tlisiseng. Empa, ho bua 'nete, ekare bosoana ho leketlisa khole eo fesetereng ea ka. Ke tla e hulela kahare feela." E ka be e oe. E ka be e oe. Molimo o hlomphile letšoao feela, joaloka letšoao la bophelo Egepeta.

<sup>115</sup> Joshua e ne e le papiso ea Jesu, hobane *Joshua* e bolela "Jehova-mopholosi." E ne e le papiso ea Jesu, o ne a tsepahetse pontšong ea letšoao le reriloeng ke moromuo a hae. Joshua a tsepahala pontšong eo ea letšoao. Bohle tlas'a lona ba bolokehile, Egepeta. Bohle ba tlas'a lona ba bolokehile, Jeriko.

<sup>116</sup> Mali a Konyana ke papiso ea Letšoao kajeno, hore Moea o Halalelang ke Letšoao la kajeno. Bohle ba tlas'a Lona ba bolokehile. Bohle ba seng tlas'a Lona ha ba bolokeha. Ho Baheberu 13:10 le 20, O bitsoa "selekane sa mehla le mehla." Selekanne sa khale e ne e le ntho e 'ngoe, sena ke se Secha, sena ke "selekane sa mehla le mehla."

<sup>117</sup> Molimo, litšepiso tsa Molimo tse tlameletsoeng Maling, li re lokolla sebeng le masoabing, le ka ho fapania le lefatše lohle. Ha u a tlameha ho apara ka ho fapania; mang le mang a ka apara ka ho fapania. U tlamehile joalo, kahare, ho fapania. Bophelo bo kahare; e seng moaparo, ho apara. "Muso oa Molimo ha se lijo le metsi, kapa ho apara moaparo; empa ke mamello, molemo, mosa, tiisetso, ka ho Moea o Halalelang."

<sup>118</sup> Joale, litšepiso li re lokolla sebeng, ho supa hobane Molimo ha o eso—eso bone sebe sa hao. Davida o itse, "Ho lehlohonolo motho eo Molimo o sa 'malleng sebe." 'Me Molimo le ka mohla o ke ke oa bala sebe holim'a Letšoao leo, hobane Letšoao ke pontšo e lefiloeng e reng Molimo o se o e amohetse. 'Me u tšoere letšoao la eona, e pri... tumelo ea hao e e rekile. 'Me o tšoere moputso oa theko ea topoloo ea hao 'meleng oa hao, ho Mo khumamela le ho bonahatsa litšepiso tsa Oona le matla.

<sup>119</sup> *Testamente e Ncha* e bolela "selekane se secha." *Mali* a bolela "Bophelo." *Testamente e Ncha* ke testamente ea Moea o Halalelang, Moea o Halalelang o pakang hore Jesu Kreste o tsohile bafung, ho supa hore Jesu o phethisitse tlhoko ea rôna eohle, le ho phela kajeno. Letšoao le paka hore O a phela ho Itsebahatsa le rôna, ho latela tsepiso ea Hae. Joale motho a ka bala Bibele joang le ho 'Mona a e tsepisitse, le ho bona

Kreste a khutla matsatsing ana a qetelo ka sebopeho sa Moea o Halalelang le ho Ipontša a phela? Leo ke Letšoao. Ke pontšo eo. Ke moputso o lefiloeng.

<sup>120</sup> U se ke, le ka mohla oa itšetleha ka tšisimoho. "Ke utloile maikutlo a chalametsang mokokotlong. 'Me—me ke—ke fofonetse ntho; ke bone mali matsohong a ka, kapa oli e itseng. Kapa—kapa, ke apesitsoe Bachulara ea Digarata. Kapa, ke hobetse ka Moea. Ke hooelelitse. Ke buile ka maleme." Lintho tseo li ka 'na tsa itōkela. Ha ke a koetla letho khahlano le tsona, empa ha se seo ke buang ka sona.

<sup>121</sup> Ke bua ka boitsebiso ba Letšoao, Jesu Kreste, ea tsohileng le ka ho rōna joale, ho Itsebisa, ho nétefatsa Lentsoe la Oona la tšepiso ea letsatsi lena bocha. Amen. Ke moo uena le Kreste le leng bang. Molimo le Kreste ba bang. "Ka letsatsi leo, le tla tseba hobane Ke ho Ntate, Ntate o ho ka 'Na; 'Na ke ka ho lōna, le lōna le ka ho 'Na." Molimo ke oo o bonahalitsoe ka nama ea motho, ho Ipontša a phela, kamorao ho lilemo tse likete tse peli. Ke Letšoao leo.

<sup>122</sup> Haeba le sa kena, kenang ka potlako ruri, metsoalle. Nako e ka tšoha e feta le kamehla. Ha re tsebe.

<sup>123</sup> Ho supa Boteng ba Hae, Testamente e Ncha, Mali. 'Me Le a phela joale, ho hlahisa linétefatso. 'Me kahobane A le teng, re na le tōkelo ho sohle seo A re reketseng sona. Monna ea nang le kolobetso ea Moea o Halalelang, kapa mosali ea nang le kolobetso ea Moea o Halalelang, o na le tōkelo ho sohle seo Jesu a re lefeletseng sona, hoba ke pontšo eo re e tšoereng. Ao ke matla a ho reka.

<sup>124</sup> Ho tea mohlala o re, "Be, Moena Branham, u bolela'ng?"

<sup>125</sup> Mona, ho e hlakisa joale, 'me ke batla lōna batho ba kulang le tšoare sena. Shebang, holane ke bolaoa ke tlala, 'me ke tseba loufu ea bohobe, ha re re, e ja kotara, ho ntoo fihla moena a re, "Kotara ke ena, Moena Branham. U bolaoa ke tlala; tšoara kotara ke ena." Joale, le a tseba, nka thabela kotara eo hakaalo letsohong la ka se sa bohobe letsohong la ka, hobane ke tšoere moputso oa theko. Ke tšoere letšoao le fumanang bohobe. 'Me bohobe ke boo hantle; 'me ntho feela, ke tšoere letšoao, kotara e rekang bohobe, nka thabela letšoao hakaalo ka ha ke tšoere bohobe.

<sup>126</sup> Joale, ha u fumane kolobetso ea Moea o Halalelang, ke Letšoao le reng u tšoere sohle sa topollo eo Jesu a e shoetseng, ke ea hao, e letsohong la hao. Na u tšaba ho e tšeka?

<sup>127</sup> Ha ke e sunya mokotleng oa ka, ke re, "Be, ha ke tsebe nka reka bohobe boo kapa che," ke tla bolaoa ke tlala. Empa hopola, morekisi o re, "Ke hloka ho le hong feela, Moena Branham. Lisente tse mashome a mabeli a metso e mehlano, u ka itholla loufu ea bohobe." Ke e fumane! Amen. Ke phetho.

<sup>128</sup> Lebaka leo re sa boneng ho etsoa lintho tse ngata kajeno, Letšoao ha le a pepesoa, Letšoao la makhonthe. Oh, re thola mafosisa a mefuta eohle, empa ke bolela Letšoao la sebele.

<sup>129</sup> Shebang, ha re elelloa 'me re hlahisa Letšoao, Bophelo bo nkiloeng bakeng sa Letšoao, Mali a re buella. Hopolang, Mali a selekane a ne a nyeheloa le Letšoao 'moho, 'me Lentsoe le re kholisetsa tsepiso. Letšoao ke pontšo e reng re lefeletsoe theko.

<sup>130</sup> Joale, haeba u sa kenyelelsoa moo, be, ehlile, ha u ke u fumana letho; u feta moleng oa thapelo feela, ho boela u tsoa u ikela; ho nyolohela aletareng, le ho lalala, ho boela u tsoa u ikela.

<sup>131</sup> Empa, oh, moena, hang ha Letšoao leo le behoa pelōng ea hao—ea hao—ea hao, 'me u e tseba e le tsoho ea Jesu Kreste ka ho uena, ntho e ntse e etsahala. Ha ho letho le tlāng ho u phethola. U tseba moo u oelang teng. Kutlo e tletseng Lentsoeng la Molimo e u neha tōkelo Letšoaaong, 'me le letho lesele. "Ho lehlohonolo ea etsang Melao ea Oona kaofela, hore a be le kabelo Sefateng sa Bophelo."

<sup>132</sup> Ka hona, ha re rapela, re tšoanelo ho tšoara Letšoao ho le hlahisa le lithapelo tsa rōna. Joale se hlolleho ho e tšoara. Ha u rapela, u tšoanelo ho tšoara Letšoao ho le hlahisa holim'a thapelo ea hao; ha u sa etse joalo, se phetse ho rapela hofihlela Letšoao le tlie, hoba ha u a tsepisoa ho e fumana. Le a bona, u tlameha ho thola Letšoao lena pele; ke moputso o lefang, tumelo ea hao e lumelang hoo.

<sup>133</sup> Joale, pontšo ea kutlo e tletseng. Tšabo e nyametse. Pauluse o re bolella seo, "Mali a bua ka litaba tse molemo."

U re, "Mali a bua?" Yaa, Mali a bua.

<sup>134</sup> Ho Genese 4:10, re fumana Molimo o boletse ha thoe—ha thoe a Kaine... kapa, "Mali a Abele a buile a tsoa mobung." Re fumana ho Baheberu 12, ho thoe, "Mali a selekane a Kreste a bolela litaba tse molemo ho a Abele." Le a bona? Re fihlela, Mali a hlide a bua, A u buella. Bophelo bo leng ka ho uena bo bua ho tsoa Maling a tšolotsoeng. Amen. Oh, moena! Ekare e mong le e mong a ka e bona. Le a bona? Ha u ka e bona seo e leng sona, ke Bophelo bo leng ka ho uena. Le a bona, Mali ao a u etsa setlama le Bona. Ke Letšoao. E... Seo e leng sona, Mali a tšoletsoe uena; u amohetse, 'me Bophelo bo kene ho uena. U na le Letšoao, oo ke Moea o Halalelang.

<sup>135</sup> Ha re rapela ke hona, re tšoanelo ho ba le Letšoao ho le hlahisa le lithapelo tsa rōna, joalokaha ke boletse, 'me joale ho lumela molemong oa rōna le ho sebelisa Letšoao ho lelapa lohle, joaloka Egepeta, Jeriko, kapa koana ho Liketso 16:31. Re fumana Pauluse a boleletse molaoli oa lekholo oa Moroma, ho re, "U lumele, 'me ntlu eohle ea hao e tla bolokeha." Le sebelise lelapeng la hao. Ha ngoana oa hao a sa bolokeha, beha Letšoao holim'a hae hantle, ho re, "Morena Molimo, ke a mo tseka." Tiisetsoa mono

hantle. Ha u e-na le 'mé kapa moratuoa ea lahlehileng, robatsa Letšoao leo holim'a bona, ho re, "Morena Molimo, ke a e tseka."

<sup>136</sup> Ntšetsa kantle, lithole tsohle tsa lefatše, tlung ea hao, ithlophisetse Lona. Chesa lishotso tsa hao. Lahlela litafole tsa hao tsa likarete hole. Lahla lisikarete tsa hao. Tomuletsa ho se lumele ha hao le lipampiri tsa hao tsa kereke moqomong oa lithole, habo tsona. Amen. Joale u ntse u ithlophisa. E ntoo ba eng? U ntoo sebelisa Letšoao thapelong, ka bopaki ba sebele, tumelo ea sebele. Le sebelise, Le sebelise ka tšepo. Ha u sebelisa Letšoao, tseba hore u hloekisitsoe. "Ha lipelō tsa rōna li sa re ahlole, re na le seo re se kōpang."

<sup>137</sup> Ha lōna batho le ntse le etsa lintho tseo tse phoso, u ka kōpa Molimo ho u etsetsa letho joang athe u itseba u le phoso? Lebaka leo re khoptjoang re kanama le ho khoptjoa re khutla. Ha ke bue sena ho utloisa bohloko. Ke bua sena ho otlolla, ho lōkisa lintho. U ka e haha joang holim'a melora ea Sodoma le Gomora? Khutlang!

<sup>138</sup> Mekha le bareri ba lesitse batho ho etsa eng le eng, le ho e phema, le ho ngola lebitso la bona feela bukeng le ho ba bitsa *sena, sane*, le se *seng*, athe ke sekhobo. 'Me esita ho fihlile moo tumelo e leng ntho e sa... ebile ke ka seoelo ho tšebjoang seo e leng sona. Bao, ba fumane tšepo, empa ha ho tumelo.

<sup>139</sup> Le tlameha ho khutlela, ho, ntho eohle e phophothiloe e hloekile. Le ho tšoara Letšoao la hao, moo u tsebang e le Jesu Kreste ka ho uena, le ho Le sebelisa. Ha ntho e sa etsahale, phoso e teng; khutlela morao hape, u tšoere ntho e phoso letsohong la hao. O e tšepisitse. Ke Eéna ea e tšepisitseng. Le sebelise. Balang Baefese 2:12, khetlo le leng, haeba u haeba u batla joalo, 'me u tla fumana kantle mono.

<sup>140</sup> Lemohang ho Baheberu 9:11, le eona. Pauluse o itse, "Ho sebeletsa Molimo o phelang, ka lipolelo tse phelang." Ha se ho e bua se sa ha nka nyoloha ka temalo ea Moheberu, ho tšoara sehlabelo sa hae, le ho theosa ka tsela, a tšoere pholoana ea tonana e nonneng, le ho e beha matsoho le ho iketsa setlama, le ho tšolla mali, ho khutla a beiloe ea lōkileng. Jehova o ne a e hlokile. O e entse. Ho ntoo hlahlama moloko, o ka tšoha o hatšela ho feta; motho e mong, o hatsela ho feta. Ntho ea pele le a tseba, e fetoha moetlo oa lelapa.

<sup>141</sup> Pentekosta e fetohile seo ho rōna, moetlo oa lelapa. Re a theoha, ho re, "Na shou eo ea thelebishene e ne e sa babatsehe bosiung bona? Ke a ipotsa ba ents'e'ng tlase kerekeng? Morena Jesu, folisa..." Oh, mohau! Le a bona? Ho fetoha ntho ea lelapa ea moetl... "U a tseba, ke buile ka maleme letsatsi le leng. Ke setho sa *sena*, kapa *sane*, u a tseba. Uh-huh." Oh, ke moetlo oa lelapa!

<sup>142</sup> Na le tseba seo Molimo o se buileng? Molimo o itse, “Mafura a lōna le lipheleu ke lephoka nkong ea ka. Ke hantle, lihlabelo tsa lōna li fetohile lephoka.”

<sup>143</sup> ‘Me li se li le joalo lihlabelo tsa Pentekosta, le mesoaso eohle ea rōna ea mekha ea bolumeli le boitšoaro, ’me basali ba rōna le banna ka boitšoaro ba bona, sebopeho sa borapeli; ho fehla ’mino, ’me motho o tlolela holimō-le-tlase nakoana; ’me ho felile, ekare e tšetsoe ka nkho ea metsi, ha Lentsoe la Molimo le ka fihla la bua ntho e itseng. Molato ke’ng? Lihlabelo tsa lōna li fetohile lephoka pel’ a Jehova.

<sup>144</sup> ‘Me lekhatheng leo ha fihla Esaia temeng, a ba bolella, “Ke tla le fa pontšo ea kamehla, moroetsana o tla emola.” Le a bona, ke moo. E seng libopeho tse shoeleng le lihlomathiso, che; empa lipolelo tse phelang, Molimo o phelang o tsohileng bafung, le ho phela har’ a rōna.

<sup>145</sup> Ba bang ba bona, likereke tsena tse joalo, tse lumelang lintho tsena, li latola ntho e kang Letšao. Be, mothaka e mong o lekile ho mpolella, “Ke baapostola ba leshome le metso e ’meli feela ba amohetseng Moea o Halalelang. E ne e le phetho. Yaa.” Oh!

<sup>146</sup> Empa rōna ba lumelang Lentsoe, re e tseba e fapanie, re a tseba hore bona ke Boteng bo phelang. Hoba re tseba joang hore ke Boteng bo phelang ba Kreste, Moea o leng har’ a rōna? O etsa se tšoanang le seo A se etsang. Ke boo bopaki ba eona. Morara o tsebjoa ka tholoana eo o e behang. ’Me eféla ha morara oo oa pele o ile oa nyoloha ’me ba ngotse Buka ea Liketso eo o hlahlamang, le ka eona ntho eo Jesu a e entseng, tseo baapostola ba li entseng; mohla morara oo o nyolohang hape, o etsa ntho e tšoanang. Le a bona, Baheberu 13:8 e re esale Ééna, oh, banna, hoo ho paka Molimo o Mo tsoselitse rōna, ho latela Lentsoe la Oona la tšepiso. [Sekheo lebanteng—Mohl]

<sup>147</sup> Tiiso ea tšepiso! Baefese 4:30 e re, “Le se ke la soabisa Moea o Halalelang oa Molimo, le tšoailoe ke ona hofihlela letsatsi la topollo ea lōna.” Ha se hofihlela tsoseletso e latelang. “Hofihlela letsatsi la topollo ea lōna!” Ho kolobeletsoa ho Oona, ho latela Bakorinthe ba Pele 12. ’Me bottlalo bohole bo ahile ho Oona, ’me ka ho Ééna sebe ha se baloe. “Ea tsoetsoeng ke Molimo, ha a etse sebe. Peō ea Molimo e lutse ho eéna, ’me a ke ke a etsa sebe.” A ka khona joang, athe Letšao le lutse mono? Letšao ke pontšo e reng o amohetsoe.

<sup>148</sup> ‘Me, be, u re, “Ke etsa sebe.” Be, ha ho le joalo ha u eso fumane Letšao. Le a bona?

<sup>149</sup> Letšao ke lerako, ho supa hore theko e lefiloe. Ha Satane a leka ho u neeletsa eona... Nahana taba ena feela. Ha Satane a leka ho u neeletsa maloetse a itseng, kapa ho leka ho u neeletsa ntho e itseng, na u tseba seo u se etsang? Mo bontše Letšao la hao. Ehlide, maloetse a hlahela Mokreste. Mo bontše Letšao la hao, u ntoo mo pakela hore u sehlahisoa se rekiloeng sa

Molimo. "Hanelia liabolosi, 'me o tla u balehela." Tšoara Letšoao la hao holim'a tumelo ea hao e sa sisinyeheng Lentsoeng la Oona la tšepiso.

<sup>150</sup> Molimo o kile oa hlahisa pontšo ea mookoli e le letšoao. Ke a koala. Ho aba pontšo ea mookoli e le letšoao. Ke saletsoe ke metsotso e ka bang leshome feela, ho nt oo tšaroa mola oa thapelo. O tšepahetse kamehla ho letšoao leo. Na O entse hoo? [Phutheho e re, "Amen."—Mohl.] O sa e etsa le joale. Lilemong tsena tsohle tse likete, le ka mohla ha A eso khone, khetlo le le leng, ho hloleha ho o pepesa. O ile a tšepahala letšoaong leo, ho re supisa kamehla A... le ka mohla ha o ke o hloleha ho hlompha matšoao a Oona. Ha ke tsotelle le haeba e le....

<sup>151</sup> Leha Jesu a ka lieha lilemo tse likete tse leshome, u tšoere Letšoao, le joale O sa ntse a tlameha ho Le hlompha. Ho sa tsotelehe lintho tse ngata tse fetohang, le eng hape, O tlameha ho hlompha Letšoao leo. O boletse A tla etsa hoo. Ke hantle. O re lebeletse ho pepesa Letšoao la Oona, holim'a tumelo ea rōna e abuoeng ke Molimo, ho mokha o mong le o mong o sa lumeleng sechabeng le lefatšeng, tse lumelang li re mehlolo le meeaka ha li latele balumeli. Le ho tšepahala nqa Letšoao lena, 'me Le supa theko ea leeto e lefuoeng 'me re amohetsoe bakeng sa tsoho, ho rua Letšoao la Bophelo ka ho rōna.

<sup>152</sup> Ke Molaetsa o hlabang oo, feela ke 'Nete. Ke seo re se hlokang, ke 'Nete. Molimo re thusé ho tseba 'Nete. "Le tla tseba 'Nete, 'me 'Nete e tla le lokolla." Ke tlaleha Jesu Kreste e le oa maobane, kajeno, le kamehla. Ke lumela Molimo o aba Moea o Halalelang joaloka Letšoao, hona joale, pejana ho exoda, ea e—ea Monyaluo ea tšoang kerekeng.

<sup>153</sup> Ke lumela ho ena le sefitahlohoana se sengata hakaale, batho ba ipolelang ba hooelelitse, ba buile ka maleme. Ke lumela linthong tseo; empa u ke ke oa itšetleha ka eona. U ka itšetleha joang ka eona, u nt oo latola Lentsoe? Le a bona?

<sup>154</sup> Letšoao ke Lentsoe le bonahalitsoeng ka ho uena, le tsoang le Iphelela. Ke mohla Molimo e leng toloko ea Oona ka Sebele. Ha u a tlameha ho re, "Be, joale, ak'o toloke leleme la ka." Ha se eona. O toloka bophelo ba hao ka Lentsoe. Ha A nka lentsoe la hao, seo u leng sona, le ho bonahatsa Lentsoe la Hae mono, hoo ha ho hloke toloko ea letho, e se e le teng. Molimo o Itolokela ka Sebele, 'me re fumane litšepiso tsena tsa letsatsi.

<sup>155</sup> Oh, Dallas, lōna sehlopha se ratehang sa Bakreste, le se ke la haptjoa ke nyee ena kajeno, eo le e bonang mathokong, hoba e tla timela. Bapala Letšoao leo kamehla, pepesa Letšoao leo. Bala Bibele. Hahamalla ntho e 'ngoe le e 'ngoe. 'Me ha moea o ka ho uena o sa re "amen" ho ntho Eo, u mpe u khutlele morao, u ananye seo u se tšoereng, ka Letšoao; ha u na Lona.

<sup>156</sup> Ke a tseba ke ho bua lintho tse ngata mona thapama e le 'ngoe. 'Me hantle joale ke mashome a mararō ka morao ho 'ne.

Ke nako joale, 'me ha re ka tsoa ka hora ea bohlano ka mola oa thapelo.

<sup>157</sup> Le a lumela Jesu Kreste o a phela o a busa kajeno? [Phutheho e re, "Amen."—Mohl.] Le a lumela ke le boleletse 'Nete? ["Amen."] Ke Letšoao, tlhoko. Nka bolela 'Nete feela. Ke bua feela seo ke se bonang, seo ke se utloang, seo ke se senoleoang. 'Me lebaka leo ke rialong; makhetlong a mashome a likete atisa ka makhetlo a likete, ha eso hlolehe ho ba 'nete le ka mohla. Joale eo e tlamehile e be e le Molimo. E tlamehile e be e le Molimo. Be, na bosebeletsi bo joalo Molimo o ka bo neha motho ea sa tsebeng seo a buang ka sona? ["Che."] Na A ka Itsebahatsa e le seboni seo mono, a ntoo hlanoha a mo nehe Lentsoe le hlakaneng? ["Che."] Mothaka ea Le hanelang, ke eéna ea hlakaneng. 'Me Molimo ha o a hlakana. Molimo ke toloko ea Oona ka Sebele.

<sup>158</sup> Amohelang Letšoao! Le se ke la itšetleha ka ho ngolisa kerekeng efe kapa libopeho life, kapa ntho efe. Fumana Letšoao! Le tšoare. Ke Eona feela ntho eo Molimo o tlang ho e hlompha. Mohla o theohang o fihla horeng eo, mohla o fihlang lefung la hao, u mpe u leketlise Letšoao leo holim'a hao; ho tseba hore ka letsatsi la ho khutla ha Hae, tsoho eo, nka hlahisa Letšoao leo. E ke ke ea ba 'meleng ona, o se o bolile; empa ka ho Moea ona, o ke keng oa shoa, ke Bophelo Bosafeleng, Letšoao le lutse mono. 'Me O tšepisitse, "Ke tla mo tsosa letsatsing la qetelo."

<sup>159</sup> Eéna Jesu Kreste eo o teng mona. Ke Moromuo. Ke e... Molaetsa ke *Ona*, 'me Ke Moromuo ea leng teng mona ho bonahatsa Molaetsa oa Hae. 'Na ha ke Moromuo. Eéna ke Moromuo, 'me *Ona* ke Molaetsa. 'Me ha o tšoere moea o hananang le *Hoo*, ekaba Moromuo oa Molaetsa joang? Ke Letšoao feela le ka O bonahatsang. Amen.

<sup>160</sup> Ke ikutloa ke halalela. Ehlide bo. Ekare nka fofa ka ikela hona joale, hoba ke tseba eo ke lumetseng ho Eéna, 'me ke bone bophelo ba ka bo entsoe setlama le Eéna tsohong ea Hae. Boteng ba Hae bo mona. Le Bo amoheleng, metsoalle, ka kópo hleng, tlase pelöng ea lóna.

<sup>161</sup> Ke a tseba bohole re nyoloha re pota aletare re rapela. Oo ke mohopolo oa khale oa Methodise. Ha ba eso etse joalo Bibeleng. Bibele e itse, "Ba lumelang ba ne ba kolobetsoa." Ke hantle. Ha ho ntho e kang memo ea aletare ka Bibeleng. Ke ntho eo re e ekelitsoeng, koana e lókile. Sohle seo Molimo o se hlohonolofatsang, se lókile.

<sup>162</sup> Joalokaha ba tlotsa masela. Ntho eo ha eso hlahe ka Bibeleng. "Ba nkile liluku le liaporone tse amileng 'mele oa Pauluse."

<sup>163</sup> Empa kamoo u batlang ho e sebetsa, e itóketse, setulong sa hao, aletareng, kae feela. Ntho feela, sebelisa Seo, Letšoao ho uena. U ntoo itekola, le ho sheba mofuta oa bophelo o tsoeletseng, ho bona haeba Le tlotsitsoe kapa che. Haeba Le

se joalo, suthisetsa seo u se tšoereng hole, kathoko, u khutle, hofihlela Letšao le tšasitsoe.

<sup>164</sup> Ha re rapeleng. Ntate ea Maholimōng, nka tšoha ke—ke—ke buile ke khahlapetsa, empa, Morena, thakhisa e tiea joang u sa e ngomele? Ke a rapela, Ntate, e tle e ngomeloe pelōng ea batho, ba e bone e se ntho ea boikakaso. Hase hore ke leka ho supa mokhatlo o itseng, bo-raseng bo itseng, bohanyetsi bo itseng, motho ea itseng, kapa 'na, kapa motho mang feela. Ke Jesu Kreste. "Ke tla hlahlela mekhatlo eo eohle 'moho," ba tšoana le mokopu o patsotsoeng kalehare, ho latela Lentsoe la Hao. "'Mé seotsoa sa khale," Bibele ho Tšenolo 17, "e ne e le 'm'a sehlola se seng le se seng." 'Me e ke ke ea eba monna. E ne e le lihlola, 'me bohle ba lihetsoe liphateng tsa selefatše. 'Me re e bone e entse joalo, Mapentekosta le bohle.

<sup>165</sup> Empa, Jesu, U itšalla u le Jesu. Ba se ke ba mamela molaetsa oa kereke; empa Molaetsa oa Kreste, Lentsoe. Ak'o Itsebahatse, Morena, kajeno, 'moho le balumeli. Folisa bakuli bohle. Tšoarela libe tsa rōna, Morena. Ke—ke rapela, joaloka mohlanka oa Hao, tšoarela libe tsa ka hle, le ho tšoarela libe tsa batho bana. Ke a tšepa, Morena. Ntle le pelaelo e mong le e mong oa bona o thusitse ka menehelo, ho lefa e—e meaho, 'me ba sebelisitse chelete ea bona, 'me ba se—ba se—ba entse sohle, Morena. Oho Molimo, ke a rapela ho se be le a mong oa bona ea e fosang, Morena. E ke e be e mong le e mong.

<sup>166</sup> Ke—ke etsa hoo ka botšepehi, 'me koana, Morena, u tšoanelia ho fina phatla. Re a tseba, ho laea ke lerato. Lerato le a laea. 'Me ke a rapela. Hoba batho ba Hao U ba laile ka morero oo, hobane U ba ratile, 'me sebe ka seng se lökela ho arabeloa.

<sup>167</sup> 'Me, Ntate, ke U rapela joale ho tšoarela libe tsa rōna, re sa ipolela tsona. Re lelerile hole, Morena. Ke iketsa setlama le batho bana ba Pentekosta, Morena. Ke—ke e mong oa bona. 'Me ke—ke a rapela, Molimo, hore U re tšoarele kaofela. Le ho tšoara baetapele ba bang bana ho ba phethola, le—le ho ba shebisa nqa Kalvari mono hang, joale ba tla lebala seo ba tšoanelang ho ba sona, mopsbeteri kapa mobishopo, kapa e ka bang eng, le ho itseba re se ba baholo 'Musong ona. Bohle re bana ba Molimo. Ke a rapela U tla re thusa joale. Itsebahatse har'a rōna, kajeno. Re kōpa ka Lebitso la Jesu Kreste. Amen.

<sup>168</sup> Joale pejana feela re qala mola oa thapelo, mona ho ka tšoha ho lutse motho a eso fihle mona pele. Ha ke u tsebe na u mang, empa Molimo o a u tseba. Eféla ha ke boletse 'Nete, a Molimo o e tsebahatse, hore ke 'Nete kapa che, kholiso ea eona ke eo. Haeba A tsohile bafung, ke Eéna maobane, kajeno, le kamehla. O boletse ho Johanne 14:12, "Ea lumelang," e seng moipehi-tumelo. "Ea lumelang ho 'Na, mesebetsi eo Ke e etsang o tla e etsa le eéna." Na ke eona?

<sup>169</sup> Motho o itse, ““Le tla etsa e fetisang ka boholo.”” Ke hantle. Ho re, “Be, re rera Evangelī, e fetisa ka boholo.”

<sup>170</sup> Etsa lintho tseo A li entseng feela, e tla nkholisa, le a bona, ke hona re tla bua ka lintho tse fetang ka boholo. Nka le bontša lintho tseo A li etsang joale li fetisa tseo A li entseng mehleng ea Hae lefatšeng, ’me hoo ha se ka ho rera Evangelī feela, le hona; ke ka lipontšo le mehlolo. Nako ea eona ha e eo. Lumela feela. ’Me Molimo oa Leholumō, O tsositseng Jesu Kreste bafung, le ho Mo hlahisa mona a phela, ho rōna, ka morao ho lilemo tse likete tse peli, o tsebahatsa Molaetsa ona, hore O lōkile. Letšoao le tlameha ho tlotsoa.

<sup>171</sup> Joale, lōna ba maloetse le mathata, rapelang, e reng feela ka botšepehi, “Morena, ke a lumela U ‘Moprista e Moholo ea ka angoang ke maikutlo a mahlomola a rōna.’ ’Me re bolelloa ke moreri enoa mona, hore U na le rōna, mona, ka hona ke batla U be le rōna le ho Itsebisa.” Joale rapelang, e mong le e mong oa lōna.

<sup>172</sup> Joale boithatelo ke ba Molimo ho bua taba. Nako e kakang! Oh, banna! Ekare le ka tseba taba, u ikutloa joang ha ntho Eo e fihla, lefatše lohle ke la hao. Amen. Ha ho liabolosi ea ka etsang letho, ke sepheli se fekisitsoeng. Morena oa ka o teng. Ntho eohle e matsohong a rōna. Amen.

Le khutse hleng. Le se ke la phethesela. Lulang ka khutso.

<sup>173</sup> Lōna ba litulong tsa bakuli, le linthong, se hopoleng tšepo e felile. Lumelang. Lōna—lōna, le fetile meleng ea thapelo, la hloleha le ho hloleha. Ha se moreri ea u rapeletseng, ea hlolehileng. Ke tumelo ea hao, ’me u qala u nahana u sa tlo hlola u etsa letho. U lumele.

<sup>174</sup> Mona, Leseli lena ke lena mona, holim’ a leleiti la ’mala le lutseng morao mona, le eme le phahamisitse matsoho ka tsela *ena*. Yaa. U ne u rapela. Yaa. U a lumela ke moporofeta oa Hae, kapa mohlanka oa Hae? Ha ke a tšoanela ho rialo, hoba e khopisa batho haholo. U na le ntho e khabane . . .

<sup>175</sup> Monna e mosoeu ke enoa, mosali oa ’mala, se sa Morena oa rōna le mosali selibeng, merabe e ’meli e fapaneng. O ba tsebisitse ho se phapang ea merabe. Mebala ea rōna ha e amane le eona ka letho. Bohle re . . . Re ka fepelana mali. Molimo o entse, ka mali a le mong, lichaba tsohle.

<sup>176</sup> U jeoa ke lihlooho tse opang, lihlooho tse opang hampe. Hape le moroalo pelōng ea hao, bakeng sa ngoana eane. ’Me u . . . O hateletsoe. [Khaitseli o re, “Amen.”—Mohl.] Ke eona hantle. Na e joalo? [“Amen.”] Ke hantle.

<sup>177</sup> Leleiti lena le lutseng hojana le uena mono, ekare o amana le uena, ke ’mé oa hao. [Khaitseli o re, “Amen.”—Mohl.] Ke hantle. [“Ho bokoe Molimo!”] ’Me phoso e teng ho eéna.

<sup>178</sup> U a ntumela, leleiti? [’Mé o re, “Amen.”—Mohl.] U etsa joalo? Bothata ba hao bo u opisa lephako. Ke hantle. Ho opa lephako la hao le letona. Na ho joalo? Phahamisa letsoho la hao, ha ho le joalo. Ha le sa tla u hlopha. U a lumela (haeba) Molimo o ka mpolella na u mang? Mof. Lowell. [“Amen.”] Ka népo. [“Amen.”] Ke hantle, o ka ikela, Morena Jesu o u neha kópo ea hao.

<sup>179</sup> Hantle ntlheng mane ho lutse leleiti le leng la ’mala, le shebile, hoo feela—feela ho batlile ho mo tabola likotoana. O nchebile hantle. O a e lumela. Hoo, na ha le bone Ntho eo hantle pela hae? O jeoa ke phieo. Ke hantle. E nyametse joale; O u folisitse. Amen.

<sup>180</sup> Hobaneng le sa lumele? “Ha le ka lumela, tsohle li a khoneha.” Na le lumela seo? [Phutheho e re, “Amen.”—Mohl.] Mona ke... Shebang batho ba ’mala! Tumelo ea lōna e kae, baheso ba basoeu?

<sup>181</sup> Hantle mona ho lutse leleiti la ’mala, o nchebile hantle, e batla e le leleti le litho. O jeoa ke lengole. O boetse o na le bothata, o jeoa ke pelō. Yaa. ’Me o na le bofokoli, ho phuphusela le lintho tse kang tseo, haholo ha u leka ho paqama, ho bipetsana. Le a bona? E etsahetse maobane bosiu. Hopola, ha ke bale kelello ea hao, empa ke tseba seo u se rapeletseng. U ne o batlile ho qoholloa ka sena, kajeno, ’me O u arabetse. Joale hape u batla u sa khone ho phahama, hoba u tšoeroe ke athritisi. Ke hantle. ’Me hape, ntho e ’ngoe, u jeoa ke mala, ke hlahala e ka maleng. Ke eona. Joale na u lumela ke moporofeta oa Hae? Ke tla e bua, leha ho le joalo. Lumela, ’me u tla phekoloa.

<sup>182</sup> U reng ka bothata ba *hao* ba mala? U a lumela Molimo o tla u phekola bathata ba mala, ea lutseng mono, le uena? U a e lumela na? Ke hantle, u ka fuoa pholiso ea mala a hao. Amen.

<sup>183</sup> U batla ho téla ho tsuba, mono, leleiti? U lumela Molimo o tla u télica ho tsuba? U lekile nako e telele. U jeoa ke mala, le uena; u lekile ho téla lisakrete. Ke sona sesosa sa mala a hao. Na u tla li téla? Ke li leleka ho uena, ka Lebitso la Jesu Kreste, ka baka la tumelo ea hao ho Mo ama.

Ke le phepetsa ho lumela Molimo!

<sup>184</sup> Mona ho lutse mosajana ea mo rapellang... moratuoa ea kokelong, o a shoa, ka mofetše. Hantle. Ke malome. Ke hantle. Haeba u se... U mohatsa moruti. U lumele ka pelō eohle ea hao, monna o tla fola.

<sup>185</sup> Ke le phepetsa ho lumela Molimo! Seo ke’ng? Boitsebiso, Jesu Kreste eo. U re, “Kreste ke’ng?”

<sup>186</sup> Ke Lentsoe. “Lentsoe le ne le le tšimolohong, Lentsoe le ne le le ho Molimo. ’Me Lentsoe le ne le etsoe nama la aha har’ā rōna.’” “Lentsoe le bohale le fetisa sabole e mahlakore-peli, ke mosenoli oa mehopolo le oa merero ea pelō.” Na ha le bone hore Lentsoe le kene har’ā rōna matsatsing a qetelo? Ke Moea o Halalelang

o nkang Lentsoe la Molimo le ho tsebahatsa Jesu Kreste, e leng Letšoao. Amen. Le a lumela na? [Phutheho e re, "Amen."—Mohl.]

<sup>187</sup> Ba tšoereng litlankana tsa thapelo le ba kae? Ha bohle ka lephakong *lena* ba tšoereng litlankana tsa thapelo, ba eme moleng ona ka *mona*. Emang feela, bohle ba ka lehlakoreng lane, lehlakore leo feela le eme mona lipakeng tsa litulo. Che, moleng oa litulo o letsohong le letona feela, hleng, hantle mane. Liashara, emang libakeng tsa lōna. Etlereha ba feta, ba bang ba tla ema, ha ba se ba fetile, ka ho fapanyetsana le lehlakore lane. Joale e mong le e mong a apare tšabo.

<sup>188</sup> Moea o Halalelang o hapile kōpano, ho builoe se lekaneng le ho etsoa ho kholisa. Ba lumelang A le teng mona ba bakae? Ba bakae ba lumelang hoba hoo ke Letšoao? Ba bakae ba lumelang hoba ke Lentsoe? [Phutheho e qala e nyakalla—Mohl.] Shebang, ba bakae ba tsebang Buka ea Baheberu e boletse, ho itsoe, "Lentsoe la Molimo le senola mehopolo e pelōng"? Ba bakae ba e tsebang? Ba bakae ba tsebang e le lona lebaka Jesu a khonneng ho senola mehopolo e pelōng tsa bona, hoba E ne e le Lentsoe? Ba bakae ba lumelang seo? Ba bakae ba lumelang sona seo se ne se ahile ho baporofeta? E ne e le bona bao Lentsoe le ba fihletseng. Joale ha Lentsoe le khutlela ho rōna, na Le ke ke la etsa ka ho tšoana? Ka hona ho ka tla joang hore Lentsoe le tsebahatsang Lentsoe, le fosahale ka Lentsoe? Oh, mohau! Tšabo!

<sup>189</sup> Hela, leleiti lena le lutseng mona, ntho e teng pelōng ea hae, hape. Ke tsoatsoile ka retoloha ka e tšoara. Na ha u Mof. Grant? Ha ke a tseba seo le ka mohla. Empa u Mof. Grant, hoba ke u bona ka eona. U jeoa ke linerefē tse u hlophang. U na, mora hao o jeoa ke ho hong hosele... mali a hae, ho kang, ho qhitsa. Ke u qholotsa ho e lumela! Amen. Ke Mong'a maemo. Ke Mong'a lefu.

Ha re rapeleng.

<sup>190</sup> Morena Jesu, e re Boteng ba Hao bo sa re tlotsa, mona ka moahong ona, 'me re a elelloa ona ke Moea o Halalelang, ke a rapela, Morena, U tle u folise motho e mong le mong ea itlamang ka lisakatuku tsena.

<sup>191</sup> Khetlo le leng, re rutoa Bibeleng, ho thoe batho ba Hao, hantle tseleng ea kutlo, ha ba tšela Leoatle le Lefubelu, eaba leoatle la ba eta pele, leetong la bona la lefatše la pallo. Molimo oa nyarela o le har'a Topallo eo ea Mollo, ka mahlo a befileng, leoatle la tšoha, la honyela, 'me Iseraele a tsoelapele ho ea lefatšeng la pallo, hantle tseleng ea kutlo.

<sup>192</sup> Oho Morena Molimo, mahlo a Hao a shebe ka Mali a Jesu Kreste, tlase kahara Letšoao lena mona leo re le leketlisang holim'a lisakatuku tsena kajeno. 'Me mang le mang ea itlamang ka sena, maloetse a tšohe, a honyele 'me batho ba Hao ba tšelete tšepisong ea 'mele o monate. "Thapelo ea tumelo e tla pholosa mobabi." Ka Lebitso la Jesu Kreste, ho be joalo. Amen.

<sup>193</sup> Bareri ba Methodise ba lumelang mona ba bakae, bareri ba Baptise, bareri ba Presbeteriene, bareri ba Baptise, Lutherane, kapa Mapentekosta? Ba bakae ba lōna ba lumelang Sena e le 'Nete? Tloong koano le eme pel'a ka re sa rapella bakuli ke hona. Nyolohelang mona, lōna bohole bareri ba lumelang.

<sup>194</sup> Ho itōketse, ha ke re? Moena Grant, ho itōketse na? [Moena Grant o re, "Ehlile."—Mohl.] Uh-huh.

<sup>195</sup> Theohela mona, moena. Moena Grant o na le bosebeletsi ba ho rapella bakuli. Monna ea khabane, monna ea lōkileng, monna eo Molimo o mo utloang le ho arabela thapelo ea hae, Moena Grant. Kajeno ke thabetse ho mo kopela ka sephaka le ho 'molella joalo, le moena oa ka. Joale o tla be a theohetse mona ho rapela le 'na.

<sup>196</sup> Ha u feta moleng ona, joalokaha ekare u feta tlas'a sefapano. Baena, le fole mela e 'meli hantle mona, hantle mona. Folang mela e 'meli; ba bang holimō mona, ba bang tlase mono.

<sup>197</sup> Moena Roy Borders, u kae? Moena Roy Borders, ke itse u teng mona. [Motho o re, "O tla khutla hantle."—Mohl.]

<sup>198</sup> Shebang mona, bareri, na le ka etsa joalo! Shebang mono. Seo se a nthabisa, baena. Bareri ba sefapano, monna ba emeng holimō mona ho iketsa setlama le Molaetsa. Ho ka etsahala'ng?

<sup>199</sup> Joale, shebang, le se e tsetlehe holim'a bareri joale. Ba tlide ho iketsa setlama se le seng. Etlereha le feta mona, iketseng setl- . . . le tšoare Letšoao ka pel'a lōna, "Morena Jesu, ke ipoletse libe tsa ka. Eaba U khutlisetsa, ka ho 'neha kolobetso ea Moea o Halalelang. Ke sehlahisoa se rekiloeng. Sebe, maloetse kapa ha ho letho le ka nthibelang ho tloha mona ho tsoelapele. Ke tsoella hantle." Tšoara ntho eo, oh, ka pel'a hao, u ntoo feta mona, 'me Molimo o tla u folisa 'me u tla tsoa mona u nyakaletse, u thabile, 'me u phekolo. Le a e lumela na? [Phutheho e re, "Amen."—Mohl.]

<sup>200</sup> Joale motho mang le mang ka mona, ha re inamiseng lihlooho tsa rōna, baena, re sa le 'moho. Ha re tsebe se tlāng ho etsahala. Re mpa re sa tsebe feela. Ha ho lebaka lefe la motho ho tsoa moahong ona thapama ena a kula. Boloka Letšoao leo pelōng ea hao, feta moleng ona oa thapelo hantle; moo bareri, ba khethetseng maphelo a bona nqa—nqa tšebetso ena, ba tla be ba eme mona, ho le bea matsoho ha le feta.

U re, "U etselitse'ng joalo, Moena Branham?"

<sup>201</sup> Ke batla lōna, e mong le e mong, a tsebe feela . . . Ha ke mofolisi. Monna bana ba na le tōkelo ea ho rapella bakuli joaloka mang osele. Ho bua 'nete, ke lumela Molimo o tla arabela thapelo ea bona pele A etsa ho ea ka. Ke khathetse 'me ke felile, le ntho eohle. Ke—ke lumela A tla araba lithapelo tsa bona. 'Me ke bana ba eme hantle mahareng a eona, ho itsebahatsa, ha ba lihlong ho nka malulo a bona. Ke ananela monna ea joalo.

<sup>202</sup> Joale, baena, ke tseba maikutlo a lōna. 'Na, ke e mong oa lōna. Ke ea lohileng letlooa la ka 'moho le lōna, kantle mona Texas, ho leka ho tšoasa e 'ngoe le e 'ngoe ea lihlapi tseo Molimo o li baletseng Bophelo, kantle mane. Ke sebetsa ka bokhoni ba ka. Ke eme le lōna, lipheresente tse lekhōlo. Ka linako tse ling ke a omana ke etsa lerata ka mekhatlo le ka lintho. Ha se hore ke khahlano le uena, moena oa ka. Ke re ke khahlano le tsamaiso e re arolang ho ba baena, ka lebaka la thuto e itseng ea borapeli. Re baena ka kolobetso ea Moea o Halalelang. Re tšoere Letšoao le tšoanang. Re amohetse Mali a le mang, re mpe re lumele hoo ke hona. Re ka kōpanela Mono (na ebe re ka khona?), baena, e mong le e mong oa rōna tlas'a Mali.

<sup>203</sup> Joale, ke ne ke hlomamisoe Mobaptise. Uena ekaba u Methodise, kapa Lutherane, kapa Presbeteriene, Pentekosta, Oneness, Twoness, Threeness, sohle seo le se tšoereng, Church of God, e ka bang eng. Hoo ha ho etse phapang ea letho. Ha re lumellane ka linthoana tseo, tloong re li lebale.

<sup>204</sup> Ntho eo re ka lumellanang ka eona, ke hore Jesu Kreste Mopholosi oa rōna o shoetse libe tsa rōna, ho tsoha hape le ho re neha Letšoao. Re eme mona ka lithapeloa tsa rōna, ho li leketlisa holim'a baena bana le likhaiseli tse fetang moleng ona. Ke tla e lumela ka pelō eohle ea ka.

<sup>205</sup> Ke bone ho etsahala ntho lekhatheng leo. Amen. Ke a tseba le nkhopola ke hlanya, feela ke ikutloa ke hlanya hamonate. Ke tšepile ho itulela ka mokhoa ona feela. E, monghali. Ke ikutloa ke le hamonate tjena.

Ha re rapeleng.

<sup>206</sup> Morena Jesu, ke tloha kalaneng ena, tlase mona, ho iketsa setlama se le seng le baena bana. Ke iketsa setlama le bona, re sa tšoere bohole Matšoao a rōna matsohong a rōna, le lipelōng tsa rōna. Re sa ntse re mamela taelo ea Hao, "ho beha bakuli matsoho, ba tla fola." Motho e mong le e mong ea fetang mona, a hlahise Letšoao la hae, le reng ba amohetse Moea o Halalelang, le reng ke ngoana oa Molimo ea tsoetoeng labobeli, le reng ba e lumela ka pelō eohle ea bona. 'Me etlereha ba feta, ba rohake lefu leo le pabo ea 'mele oa bona. 'Me ba tsoe mona ba nyakaletse, ba tseba hobane tumelo ea bona e ba phelisitse.

<sup>207</sup> 'Me, Morena Molimo, joalokaha re ile ra beha, Testamenteng ea Khale, matsoho a rōna holim'a sehlabelo, ho iketsa setlama se le seng le sehlabelo, re beha matsoho a rōna holim'a Jesu re iketsa setlama se le seng le Eéna. O ile a re beha matsoho a Hae joale holima rōna bosebeletsing bona, ho Iketsa setlama le rōna, ka lipontšo le meeka. 'Me rōna re beha bakuli matsoho, ho iketsa setlama le bona, tumelo ea rōna e hokahane le bona. Maloetse a tlameha ho falla, e etse joalo ka Lebitso Jesu Kreste, re sa theohela mono ho e amohela.

Phutheho eohle e rapele.

<sup>208</sup> Ha re reng Roy kapa motho mang a tl'o ema maekrofonong ona, ho otlolla mela.

<sup>209</sup> Shebang, etlereha le feta mona joale, tloong le lumela, tloong le rapela. Re tla beha bakuli matsoho feela. Tloong le fete hantle. Rapelang. Etlereha le feta meleng ea bareri bana; ha u ikokotlela ka melangoana, e behe fatše u tlohe u ikele. U ne u tšoeroe ke mofetše, maloetse, e re, "Ngaka e sebelitse ka bokhoni bohole ba eona, e entse ka bokhoni bohole, 'me o itse ke tlamehile ho shoa. Nke ke ka shoa. Letšoao la ka ke lena, Morena. U mpaletse mashome a tšeletseng le leshome la lilemo. 'Me ke haola hantle mona, ke etsa hoo." Le a bona, etsang hoo. Na le tla e etsa? [Phutheho e re, "Amen."—Mohl.] Ka Lebitso la Jesu, ho be joalo. Amen.

<sup>210</sup> Ke hantle, u ka fetisa mola. [Moena Branham a e na le bareri ba rapella bakuli, moena a ntse a eteletse phutheho ka sefela *Lumela Feelā* le lifela tse ling. Sekheo lebanteng—Mohl].

Ke a lumela!

Lipelaelo tsa ka tsohle li epetsoe Selibeng.

<sup>211</sup> Na le a e lumela? [Phutheho e re, "Amen."—Mohl.] Amen. Oh, na ha A babatsehe? ["Amen."] Ba bang ba bona ba ne ba lutse mealong eo le literechara, ba ile ba ema hantle ba ikela; ho li siea li rapeletse mono feela, ho tloha ba ikela. Oh, ke hore mang le mang a ka folisoa joale, ea ka e lumelang. Le a lumela na? ["Amen."]

<sup>212</sup> Re fe lehlaso, *Ke A Mo Rata*, ka kōpo, khaitseli; sefela sa khale, "Ke a Mo rata, ke a Mo rata hoba . . ."? Bohle re phahamise mantsoe a rōna feela, le matsoho a rōna, lipelō tsa rōna, ho Molimo, re bine, "Ke a Mo rata, ke a Mo rata, hoba A nthatile pele." E mong le e mong joale.

Ke a Mo rata, ke a Mo rata  
Hoba A nthatile pele  
Le ho lefella poloko ea ka  
Ho Kalv- . . .

<sup>213</sup> Leleiti, le tsoile setulong sa bakuli, o tsamaea a tšeheLitsoe ke banna ba babeli. "Ke. . ." Ha re tsokoletseng Molimo matsoho a rōna, "Ke a Mo rata!"

Ke a Mo rata  
Hoba A nthatile pele  
Le ho lefella poloko ea ka  
Ho Kalvari . . .

Ha re Mo roriseng feela joale, e mong le e mong!

<sup>214</sup> Khanya ho Molimo! Re U leboha hakakang, Morena Jesu, ka molemo oa Hao, Boteng ba Hao. Oh, re U leboha ka Letšoao, Morena. Re pholositsoe 'me re tlatsitsoe ka Moea, Moea o Halalelang o phalla mebeleng ea rōna joale. Re U leboha

hakae ka sena, Ntate! Oh, ka Lebitso la Jesu re a U leboha. Amen. Amen.

<sup>215</sup> Le tsukutlane ka matsoho bohole, le re, “Ho bokoe Morena!” Le tsukutlane ka letsoho, le re, “Ho bokoe Morena! Ho bokoe Morena!” (...?...) Ke hantle, joale, ’moho bohole hape.

Ke a Mo rata, (matsoho a leletse, pelō e leletse)

Ke... (e hlalose e tsoa pelōng ea hao)

Hoba A nthatile pele (Na u tlil'o re qhalanya?)

Le ho lefella poloko ea ka

Sefateng sa Kalvari.

<sup>216</sup> Joale ha re inamiseng lihlooho tsa rōna tšabong ea ruri, ha ke fetisetso tšebeletso joale ho Moena Grant ho re qhalanya; liteboho ho e mong le e mong oa lōna. Pele, ho leboha Morena ka molemo oa Hae, mohau oa Hae, le ka tiisetso eo ke tsepang re e siile pelōng tsa lōna, hore mona ha re bang. Molaoli oa rōna oa Sehlooho o har'a rōna. Mohoo oa Khosi o liahelong. 'Me re leboha Morena, ho bona matla a Hae a maholo le mohau oa Hae o moholo. 'Me joale re inamise lihlooho tsa rōna ka tšabo. Moena Grant.



*LETŠOAO* SST64-0308  
(The Token)

Molaetsa wona, ka Moena William Marrion Branham, o rerilwe sethatong ka Senyesemane, Sontaha thapama, Hlakubele 8, 1964, Soul's Harbor Temple, Dallas, Texas, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2020 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)